

宋文鑑

和/6
339
夕



宋文鑑卷第十五

五言古詩

新居感詠

杜衍

幽居卽事

杜衍

和王校勘中夏東園

晏殊

列子有力命王充論衡有命祿覽之有感

晏殊

贈劉潛歸陶邱

石延年

鄱陽酬泉州曹使君見寄

范仲淹

四民詩

范仲淹

畫錦堂

韓琦

歲晏出沐感事內訟

宋庠

秋日白鷺亭向夕風晦有作

王琪

水谷夜行寄子美聖俞

歐陽脩

讀徂徠集

歐陽脩

利
292
4



新錢
有物

重讀徂徠集

歐陽脩

獲麟贈姚闢先輩

歐陽脩

喜雨

歐陽脩

飛蓋橋翫月

歐陽脩

奉答子華學士安撫江南見寄之作

歐陽脩

感興二首

歐陽脩

讀書

歐陽脩

感事

歐陽脩

董永

葉清臣

憫農

葉清臣

縣齋對雪

梅堯臣

秋思

梅堯臣

郭之美忽過云往河北謁歐陽永叔沈子山

梅堯臣

送王判官之江陰軍幕

梅堯臣

范饒州坐中客語食河豚魚

梅堯臣

送薛氏婦歸絳州

梅堯臣

川上田家

梅堯臣

送王介甫知毗陵

梅堯臣

新居感詠

杜衍

無似老且病唯恐歸田遲一旦得引年九天還聽卑尙霑二品祿
俾盡百年期恩深淪骨髓感極橫涕洟始營菟裘地來向睢水湄
城隅取窮僻匠者窵求奇卜築悉由已軒牖亦隨宜外以庇風雨
內以安妻兒鶯雀莫羣噪鷓鷯才一枝因念古聖賢名為千古垂
何嘗廣居室儉為後人師亞聖樂簞食寢邱無立錐文終防勢奪
景桓恥家為文園四壁立鄭公小殿移伊余具員者適會承平時
無術毗萬務無才撫四夷為郡亦齷齪勞心徒孜孜保身已天幸
拊已宜自知開卷顏閒厚復懼來者嗤勗哉知止足清白猶可追

幽居卽事

杜衍

寂寂復寂寂告老閑居日徑草高於人林鳥熟如客黃卷不釋手
清風常滿室內顧平生心無過此時適

和王校勘中夏東園

晏殊

東園何所樂所樂非塵事野竹亂無行幽花晚多思閑窺魚尾赤
暗辨蜂腰細樹影密遮林藤稍狂冑袂藩蔬足登膳陶秫徑取醉
幸獲我汝交都忘今昔世歡言捧瑤佩願以疎麻繼

列子有力命王充論衡有命祿極言必定之致覽之有感

晏殊

大鈞播羣物零茂歸自然默定既有初不為智力遷禦寇導其流
仲任派其源智愚信自我通塞當由天宰世曰皋伊迷邦有顏原
吾道誠一概彼途鍾百端卷之入纖毫舒之盈八埏進退得其宜
夸榮非所先朝聞可夕隕吾奉聖師言

贈劉潛歸陶邱

石延年

丈夫未大用身與仁義閑可宜更聚散風塵摧其顏君今歸柯澤
路出梁宋閒梁宋有吾廬親老待我還矧復君先歸因君頭應斑
春老有時回人老不再少草自有時榮髮白不再好人生不如春
髮生不如草可堪送別春草前青春未老人先老

鄱陽酬泉州曹使君見寄

范仲淹

吾生豈不幸所稟多剛腸身甘一枝巢心苦千仞翔志意苟天命
富貴非我望立譚萬乘前肝竭喉無漿意君成大舜千古聞羶香
寸懷如春風思與天下芳片玉棄且在雙足何辭傷王章死於漢
韓愈逐諸唐獄中與嶺外妻子不得將義士撫卷起眦血一霧裳
胡弗學揭厲胡弗隨低昂于時宴安人滅然已不揚匹夫虎敢鬪
女子熊能當況彼二長者烏肯巧如簧我愛古人節皎皎明於霜
今日貶江徼多慙韓與王罪大禍不稱所損傷纖芒盡室來官下
君恩大難忘酒聖無隱量詩豪有餘章秋來魏公亭金菊何煌煌
登高發秘思聊以攄吾狂卓有梅聖俞作邑郡之旁矯首賦虛烏

擬彼歌滄浪因成答為戲移以贈名郎泉南曹使君詩源萬里長
復我百餘言疑登孔子堂聞之金石音純純自宮商念此孤鳴鶴
聲應來遠方相期養心氣彌天浩無疆鋪之被萬物照之諧三光
此道果迂闊陶潛吾醉鄉

四民詩

范仲淹

前王詔多士咸以德為先道從仁義廣名由忠孝全美祿報爾功
好爵縻爾賢黜陟金鑑下昭昭媿與妍此道日以疎善惡何茫然
君子不斥怨歸諸命與天術者乘其隙異端千萬惑天道入指掌
神心出胷臆聽幽不聽明言命不言德學者忽其本仕者浮於職
節義為虛言功名思苟得天下無所勸賞罰幾乎息陰陽有變化
其神固不測禍福有倚伏循環亦無極前聖不敢言小人爾能憶
裨竈方激揚孔子甘寂默六經無光輝反如日月蝕大道豈復興
此弊何時抑末路競馳騁澆風揚羽翼昔多松柏心今皆桃李色
願言造物者迴此天地力

聖人作耒耜蒼蒼民乃粒國俗儉且淳人足而家給九載襄陵禍
此戶獨安輯何人變清風驕奢日相襲制度非唐虞賦斂由呼吸
傷哉桑穀人常悲大弦急一夫耕幾瓏游墮如雲集一蠶吐幾絲
羅綺如山入太平不自存凶荒亦何及神農與后稷有靈應為泣
先王教百工作為天下器周且意不朽刊之攷工記嗟嗟遠聖人
制度日以紛窈窕阿房宮萬態橫青雲熒煌甲乙帳一朝那肯焚
秦漢驕心起陳隋益其侈鼓舞天下風滔滔弗能止可堪佛老徒
不取慈儉書竭我百家產崇爾一室居四海競如此金碧照萬里
茅茨帝者榮今為庶人恥宜哉老成言欲擺般輪指
嘗聞商者云轉貨賴斯民遠近日中合有無天下均上以利吾國
下以藩吾身周官有常籍豈云逐末人天意亦何事狼虎生貪秦
經界變阡陌吾商苦悲辛四民無常籍茫茫偽與真游者竊吾利
墮者亂吾倫滄源一以蕩頽波浩無津可堪貴與富侈態日日新
萬里奉綺羅九陌資埃塵窮山無遺寶竭海無遺珍鬼神為之勞

天地為之貧此弊已千載千載猶因循桑柘不成林荆棘有餘春
吾商則何罪君子恥為鄰上有堯舜主下有周召臣琴瑟願更張
使我歌良辰何日用斯言皇天豈不仁

畫錦堂

韓琦

古人之富貴歸於本郡縣譬若衣錦游白晝自光絢不則如夜行
雖麗胡由見事累載方冊今復著俚諺或縮太守章或擁使者傳
歌樵忘故窮滌器掩前賤所得快恩仇愛惡任驕狷其志止于此
士固不足羨茲子來舊邦意弗在矜衒以疾而量力懼莫稱方面
抗表納金節假守冀鄉便帝曰其汝俞建纛往臨殿行路不云非
觀歎溢郊甸病軀諧少休先隴遂完繕歲時存父老伏臘潔親薦
恩榮孰與偕衰劣愧獨擅公餘新此堂夫豈事飲燕亦非張美名
輕薄託紳弁重祿許安閑願已常競戰庶一視題榜則念報主眷
汝報能何為進道確無倦忠義聳大節匪石烏可轉雖前有鼎鑊
死耳誓不變丹誠難悉陳感泣對筆硯

歲晏出沐感事內訟

宋庠

山海有完士希世無良籌偶穿東郭履遂別野人舟不恥篆刻賦
來肩英俊游私智甚鳧短塵容若鴟愁備員太史氏補屬富人侯
姑學了官事何嘗分主憂曰貪斗食利歲感星躔周中都富才彥
方駕若龍虬茂先善史漢平津治春秋高文用司馬格五寵吾邱
閒闊路逢葛纘紛人召鄒桑羊興賈豎安國出縲囚汲鄭貴交盛
徐陳英藻迺况乃天下樞雄雌來九州衣冠徑復道鼓吹出長楸
席上萬錢箸橋邊八列騶雍容絃魯玦意氣拂吳鉤咨余良不遑
甌甃厠琳瑯吹竽昔已濫在梁今可尤臺閣魏舒被風霜蘇季裘
有志謝軒鶴無機防海鷗恭埃杜陵課誅茅歸故疇

秋日白鷺亭向夕風晦有作

王琪

白鷺傲西軒棟宇窮爽塏千峯若聯環翠色不可解是時天雨曠
六幕無纖靄金斗熨秋江素練橫衣帶乾坤清且斂氣象朝昏改
蘆花作雪風飛舞來滄海九霄汀鷺起萬里檣烏快月上三山頭

鳥沒橫塘外滄茫洲渚寒銀錯星斗大開樽屏絲竹披襟向簫籟
余生本江湖偃蹇欣所會清興雖自發苦嗜亦吾累魚龍憑夜濤
四面忽滂湃安得犀燈然煌煌發水怪

水谷夜行寄子美聖俞

歐陽脩

寒雞號荒林山壁月倒掛披衣起視夜攬轡念行邁我來夏云初
素節今已屆高河瀉長空勢落九州外微風動涼襟曉氣清餘暖
緬懷京師友文酒邈高會其閒蘇與梅二子可畏愛篇章富縱橫
聲價相磨蓋子美氣尤雄萬竅號一噫有時肆顛狂醉墨灑霧霏
譬如千里馬已發不可殺盈前盡珠璣一難束汰梅公事清切
石齒漱寒瀨作詩三十年視我猶後輩文詞愈清新心意難老大
譬如妖韶女老自有餘態近詩尤古硬咀嚼苦難噉初如食橄欖
真味久愈在蘇豪以氣轢舉世徒驚駭梅窮獨我知古貨今難賣
二子雙鳳凰百鳥之嘉瑞雲煙一翱翔羽翮一摧鍛安得相從游
終日鳴噦噦問胡苦思之對酒把新蟹

讀徂徠集

歐陽脩

徂徠魯東山石子居山阿魯人之所瞻子與山峩峩今子其死矣
東山復誰過精魄已埋沒文章豈能磨壽命雖不長所得固已多
舊藁偶自錄滄溟之一蠹其餘誰付與散失存幾何存之警後世
若鑑照妖魔子生誠多難憂患靡不罹音羅宦學三十年六經老研
摩問胡所惠心仁義已與軻揚雄韓愈氏此外豈知他尤勇攻佛
老奮筆如揮戈不量敵眾寡膽大身么麼往年遭母喪泣血走岷
峩垢面跣雙足鋤犁事田坡至今鄉里化孝悌勤蠶禾昨者來太
學青衫踏朝靴陳詩頌聖德厥聲續倚那羔鴈聘黃晞晞驚走鄰
家施爲可怪駭世俗安委蛇謗口由此起中之若飛梭上賴天
子明不挂網者羅憶在太學年大雪如翻波生徒日盈門飢坐列
鴈鵝絃誦聒鄰里唐虞賡詠常續最高第騫游各名科豈止學
者師謂宜國之幡天壽反仁鄙誰尸此偏頗不知詼詼者又忍加
詆訶聖賢要而遠毀譽暫誼譁生爲舉世疾死也魯人嗟作詩遺

魯社祠子以爲歌

重讀徂徠集

歐陽脩

我欲哭石子夜開徂徠編開編未及讀涕泗已漣漣勉盡三四章
收淚輒忻懽切切善惡戒丁寧仁義言如聞子談論疑子立我前
乃知長在世誰謂已沉泉昔也人事乖相從常苦難今而每思子
開卷子在顏我欲貴子文刻以金玉聯金可爍而銷玉可碎非堅
不若書以紙六經皆紙傳但當書百本傳百以爲千或落於四夷
或藏在深山待彼謗焰熄放此光芒懸人生一世中長短無百年
無窮在其後萬世在其先得長多幾何得短未足憐惟彼不可朽
名聲文行然讒誣不須辨亦止百年間百年後來者憎愛不相緣
公議然後出自然見媿妍孔孟困一生毀逐遭百端後世苟不公
至今無聖賢所以忠義士恃此死不難當子病方革謗辭正騰喧
眾人皆欲殺聖言獨保全已埋猶不信僅免斲其棺此事古未有
每思輒長歎我欲犯眾怒爲子記此冤下紆冥冥忿仰叫昭昭天

書於蒼翠石立彼崔嵬巔詢求子世家恨子兒女頑經歲不見報
有辭未能銓忽開子遺文使我心已寬子道自能久吾言豈須鐫

獲麟贈姚闢先輩

歐陽脩

世已無孔子獲麟意誰知我嘗爲之說聞者未免非而子獨曰然
有如墳應箠惟麟不爲瑞其意乃可推春秋二百年文約義甚夷
一從聖人沒學者自爲師崢嶸眾家說平地生嶮巇相沿益迂怪
各鬪出新奇爾來千餘歲舉世不知迷焯哉聖人經照耀萬世疑
自從蒙眾說日日遭蔽虧常患無氣力掃除浮雲披還其自然光
萬物皆見之子昔已好古此經手常持超然出眾見不爲俗牽卑
近又脫賦格飛黃擺銜羈聖門關大道夷路肆騰嬉便可勦眾說
旁通塞多歧正途趨簡易慎勿事嶮崎著述須待老積勤宜少時
苟思垂後世大禹尙胼胝顧我今老矣兩瞳蝕昏眵大書難久視
心在力已衰因思少自弃今縱悔可追戒我以勉子臨文但吁嘻

喜雨

歐陽脩

大雨雖霽需隔徹分晴陰小雨散浸淫為潤廣且深浸淫苟不止
利澤何窮已無言雨大小小雨農尤喜宿麥已登實新禾未抽秧
及時一日雨終歲飽豐穰夜響流霖霖晨暉霽蒼涼川源淨如洗
草木自生光童稚喜瓜芋耕夫望陂塘誰云田家苦此樂殊未央

飛蓋橋翫月

歐陽脩

天形積輕清水德本虛靜雲收風波止始見天水性澄光與粹容
上下相涵映乃於其兩閒皎皎掛寒鏡餘暉所照耀萬物皆鮮瑩
矧夫人之虛豈不醒視聽而我於此時倏然發孤詠紛昏忻洗滌
俯仰恣涵泳人心曠而閑月色高愈迴惟恐清夜闌時時瞻斗柄

奉答子華學士安撫江南見寄之作

歐陽脩

百姓病已久一言難遽陳良醫將治之必究病所因天下久無事
人情貴因循優游以為高寬縱以為仁今日費其小皆謂不足論
明日壞其大又云力難振旁窺各陰拱當職自逡巡歲月寢墮頽
紀綱遂紛紜坦坦萬里疆蚩蚩九州民昔而安且富今也迫以貧

疾小不加理浸淫將徧身湯劑乃常藥未能去深根鍼艾有奇功
暫痛勿吟呻痛定支體胖乃知鍼艾神猛寬相濟理古語六經存
蠹弊革僥倖濫官絕貪昏牧羊而去狼未為不仁人俊又沈下位
惡去善乃伸賢愚各得職不治未之聞此說乃其要易知行每艱
遲疑與果決利害反掌閒捨此欲有為吾知力徒煩家至與戶到
飽饑而衣寒三王所不能豈特今所難我昔忝諫列日常趨紫宸
聖君堯舜心閔極憂勤子華當來時玉音耳常親上副明主意
下寬斯人屯江南彼一方巨細則可詢諭以上恩德當冬反陽春
吾言乃其概豈止一方云

感興二首

歐陽脩

懷祿不知慙人雖不吾責貧交重意氣握手猶感激煌煌腰間金
兩鬢颯已白有生天地閒壽考非金石古人報一飯君子不苟得
憂來自悲歌涕淚下沾臆
仕宦希寸祿庶無饑寒迫讀書為文章木以代耕織學成頗自喜

祿厚愈多責挾山以超海事有非其力君子貴量能無輕食人食

讀書

歐陽脩

吾生本寒儒老尚把書卷眼力雖已疲心志殊未倦正經首唐虞
偽說起秦漢篇章已句讀解詁及箋傳是非自相攻去取在勇斷
初如兩軍交乘勝方酣戰當其旗鼓催不覺人馬汗至哉天下樂
終日在几案念昔始從師力學希仕宦豈敢取聲名惟期脫貧賤
忘食日已晡燃薪夜侵旦謂言得志後便可焚筆硯少償辛苦時
惟事寢與飯歲月不我留一生今過半中閒嘗忝竊內外職文翰
官榮日清近廩給亦豐羨人情慎所習酖毒比安宴漸追時俗流
稍稍學營辦盃盤窮水陸賓客羅俊彥自從中年來人事攻百箭
非惟職有憂亦自老可歎形骸苦衰病心志亦退懦前時可喜事
閉眼不欲見惟尋舊讀書篇簡多朽斷古人重溫故官事幸有閒
乃知讀書勤其樂固無限少而干祿利老用忘憂患又知物貴久
至寶見百鍊紛華暫時好俯仰浮雲散淡泊味愈長始終殊不變

何時及殘骸萬一免罪譴買書載舟歸築室潁水岸平生頗論述
銓次加黠竄庶幾垂後世不默死芻豢信哉蠹書魚韓子語非訕

感事

歐陽脩

空山一道士辛苦學延齡一旦隨物化反言仙已成開墳見空棺
謂已超青冥尸解如蛇蟬換骨蛻其形既云須變化何不任死生

董永

葉清臣

董生少失母老父鰥且貧無田事耕稼客作奉晨昏朝推鹿車去
大樹爲庭藩農家乏甘旨糠粃苟自存父死不得藏粥身奉九原
人道孝爲本畎畝知所尊傷嗟世教薄至行豈足論廩祿厚妻子
樛樹遺其親斬吝一坏土因循三尺墳空令邱壑閒凜凜慙英魂

憫農

葉清臣

甲子孟冬予隨牒之吳郡汎舟丹陽毗陵閒徐步野次周視民田
其苗甚豐而穀皆秕問諸穫者則曰是春無雨中夏始布秋未及
實霜降而秕奔訴諸縣已更季旦吏曰農田之制不是過也子姑

輸之雖然予卒歲不粒矣聞之有感故作是詩

五月雨未沛吾民耕固遲中秋霜早至我稼颯其委膏澤歎苦晚
芄苗惜遽衰盈疇皆秕稗卒歲誤京坻國儲三年蓄人悲一頃莫
編齊陳牒訴奔走失程期縣籍拘彝制官征有定規勞歌不可繼
為作憫農詩

縣齋對雪

梅堯臣

密雪夜來積起見萬物春山川忽改色草木一以新古邑失荒穢
王路覆平均從茲慶豐年蹈詠慙小臣

秋思

梅堯臣

梧桐在井上蟋蟀在床下物情有與無節候不相假寥寥風動葉
颯颯雨墮瓦耳聽心自靜誰是忘懷者

郭之美忽過云往河北謁歐陽永叔沈子山

梅堯臣

春風無行迹似與草木期高低新萌芽閉戶我未知忽聞人扣門

手把蟠桃枝問我此蟠桃緣何結子遲但笑不復答問者當自推
振衣向河朔河朔人偉奇以茲不答意遲子北歸時

送王判官之江陰軍幕

梅堯臣

往時初渡江頗愛江南美誰知坐臥閒思極煙波裏絮逐魴魚繁
鼓添蕤線紫君行語風物到日應相似

范饒州坐中客語食河豚魚

梅堯臣

春洲生荻芽春岸飛楊花河豚當是時貴不數魚蝦其狀已可怪
其毒亦莫加忿腹若封豕怒目猶吳蛙庖煎苟失所入喉為鏢鏹
若此喪軀體何須資齒牙持問南方人黨護復矜誇皆言美無度
誰謂死如麻我語不能屈自思空咄嗟退之來潮陽始憚餐龍蛇
子厚居柳州而甘食蝦蟇二物雖可憎性命無舛差斯味曾不比
中藏禍無涯甚美惡亦稱此言誠可嘉

送薛氏婦歸絳州

梅堯臣

在家勗爾勤女功無不喜既嫁訓爾恭恭已乃遠恥我家本素風

百事無有侈隨宜，具奩箱不陋，復不鄙。當須記母言，夜寐仍夙起。慎勿窺窗戶，慎勿輒笑毀。妄非勿較競，醜語勿辨理。每順舅姑心，況逆舅姑耳。爲婦若此能，乃是儒家子。看爾十九年，門閭未嘗履。一朝陟大行，悲傷黃河水。車徒望何處，哭泣動隣里。生女不如男，天親反由彼。

川上田家

梅堯臣

斜光隔河明，入照桑柘下。皋隴生麥苗，青青尙堪把。遠見牛羊歸，相親童稚野。醉歌秋草間，頗與世家寡。

送王介甫知毗陵詩

梅堯臣

吳牛常畏熱，吳田常畏枯。有樹不蔭犢，有水不溉秣。孰知事春農，但知急秋租。太守迫縣官，堂上怒奮鬚。縣官促里長，堂下鞭扑俱不體。天子仁不恤，黔首逋借問彼爲政一。一何所殊，今君請郡去。預喜民將蘇，每觀二千石。結束辭國都，絲鞵加錦緣。銀勒以金塗，兵吏擁後隊。劍撾盛前驅，君又不若此。革轡障泥烏，徐行問風俗。低意撫疲鴛，下情靡不達。略細舉其麓，曾肯爲眾異。亦罔爲世趨，學詩聞已熟。愛棠理豈無。

宋文鑑卷第十五

宋文鑑卷第十六

五言古詩

檢書

感興

哭尹師魯

秋懷

同持國宿太學官舍

牟駝岡閱馬

許希

東州逸黨

贈張績禹功

小孤山

雜詩效玉川體

雜詩二首

蘇舜欽

蘇舜欽

蘇舜欽

江休復

江休復

江休復

顏太初

顏太初

石介

劉敞

劉敞

劉敞

示張直溫

朝乘

哀張子厚先生

今古路

漢文帝

戴不勝

司馬遷

揚雄

楊劉

日出堂上飲

我欲往滄海

少狂喜文章

今日非昨日

送潮州呂使者

劉敞

劉敞

司馬光

司馬光

王安石

王安石

王安石

王安石

王安石

王安石

王安石

王安石

王安石

王安石

雜詠

謝公墩

同昌叔賦鴈奴

寓言四首

遊士山示蔡天啟

夜夢與和甫別如赴北京時和甫作詩覺而有作因簡純甫

王安石

王安石

王安石

王安石

王安石

王安石

王安石

王安石

蘇舜欽

獨卧有懷

檢書

煩心思所持屏事入小閣躡樸下塵梁侈侈張敗笈雨爛百數番
蟲食三四夾軒昂醉墨鬧纖悉新書雜魚子或破碎蠶兒尙狎恰
快心伯長文跋尾清臣榻幼辭反知進故句時自慙墜亡多玩愛
存聚必券帖疏密交及戚前後生與溘誨束儼父師寒暑布兒妾
謔浪突忽還私匿情再接愴事涕涔涔憫時歎啾啾一餉誠寂寞

千里遽會合遊心到句涌開眼見蒼雲京華歷歷復節物恩恩涉
恍爾驚異方遁去乃幾臘回頭厭襍積舉體覺疲爾束閣聊欠伸
夢斷風一颯

感興

蘇舜欽

後寢藏衣冠前廟宅神主吾聞諸禮經此制出中古秦嬴食先法
乃復祭於墓漢衣以月遊於道蓋無取宣帝尊祖廟失制徧九土
孝元酌前文一旦悉除去魏帝樂銅臺遺令置歌舞昏嗣竟從之
此事狂夫阻唐制益紛華諸陵鎖嬪御曠女日哀吟於先亦奚補
吾廟 三聖人乘雲不可覩威靈已霄漢 嗣皇念 宗祖繪事
移天光刻象肖神武徧勅舊遊地輪材起宮宇階城卸以金牆壁
衣之黼功既即奉迎法仗疊簫鼓玩好擇珍奇目奪不可數三京
佛老家已有十數處朝家雖奉先越禮古不許君不祭臣僕父不
祭支庶丹楹豈非孝聖貶甚蕭斧大祀當以時寢廟即其所惜哉
恭儉德乃爲侈所監痛乎神聖姿遂與夷爲侶蒼生何其愚瞻歎

走旁午賤子私自歎傷時淚如雨

哭尹師魯

蘇舜欽

前年子漸死子哭大江頭今年師魯死子方旅長洲初聞尙疑惑
涕淚已不收舉盃欲向口荆棘生咽喉憶初定交時後前穆與歐
君顏白如霜君語清如流子年又甚少學古眾所羞君欲舉拔萃
聲譽日搜搜不鄙吾學異推尊謂前修今踰二十年迹遠心甚稠
後會國南門夜談雪滿樓青燈照素髮酒闌氣益適昨君握兵柄
節制關外侯子才入册府俄作中都囚飛章力辯雪危言動前旒
時雖不見省凜凜壓眾媮旋聞君下獄六月送渭州渭州舊治所
昔擁萬貔貅堂中坐玉帳堂下森蛇矛令嚴山石裂恩煦春色浮
覺生無根牙眾言起愆尤返來入狴犴吏對安可訓法冠巧權詐
刺骨不肯抽削秩貶漢東驅迫日置郵窮塗無一簪百口誰相賙
諸子繼死亡清血漬兩眸貿然幾喪明憤苦結不瘳君性本剛峭
安可小屈柔暴罹此冤辱苟活何所求人間不見容不若地下遊

又疑天憎善專與惡報讐二豎潛膏肓眾鬼來挪廠棄局奔南陽
後事得所投心膽向卓犖精明已彌留生平經緯才蕭瑟掩一邱
青天自茫茫長夜何悠悠萬物孰不死死常在嚴秋君齒方盛壯
眾期樹風猷二邊況橫猾四海皆瘡痍斯時忽云亡孰爲朝廷憂
予方編吳氓日自親鋤耰無緣匍匐救兀兀空悲愁時思莊生言
所樂唯髑髏物理不可詰此說誠最優

秋懷

江休復

西風萬里至曠然天地秋暮雨生夕涼百蟲鳴啾啾楚山曉蒼蒼
楚水亦悠悠騷人試登臨感物增離憂所思在遐方欲往路阻脩
香草有蕙茝嘉樹有梧楸白露委芳馨彫零使我愁窮年倦羈窘
江湖思舊游綴蘭製芰荷飄泛一葉舟肆情雲水間意適何所求

同持國宿太學官舍

江休復

翳翳雲月薄泠泠雪風清學省夜岑寂天街斷人行廣庭層閣陰
尋廊步餘明松篠遞遙響如聞絃調聲悠悠子佩詩講坐塵埃生

迴就直舍休疊疊談道精心會境物融泯然遺世營寒眠屢展轉
寤言寫素誠

牟駝岡閱馬

江休復

牧馬散近坳閱視乘高秋駝岡似沙苑惟阜帶川洲坡陀故梁城
縈薄西南陬連棚映林樾星羅倚層邱回風吹陣雲奔騰欲來游
野性脫羈馵飲齧遂所求腹幹頗肥張鬱怒何彪休羣毆驟麋鹿
逸勢凌蛟虬軍戎選輕捷和鑿御調柔毛物有千名眾美歸驂騶
梁王愁思臺佛刹居上頭竭來一憑眺遺墟莽悠悠信陵骨已朽
巖穴誰見收當時英豪輩事逐東波流置酒臨風軒聊以紓煩憂

許希

顏太初

鍼工許希下蔡人住梁門西市三十年及天聖中皇躬違裕有內
戚達其姓名上召見三進鍼而疾平而授尙藥奉御其賜予不
可勝紀謝恩畢西向而拜上詢其故奏曰臣拜本師扁鵲也
上惜其用心不忘本給錢五十萬爲立祠封曰靈應侯或曰人生

乎世慎乎習希失其習者也使希不習醫而習儒其遇主之日不
忘先師明矣若然則讀書爲儒乘時取富貴高冠長劍昂昂廟堂
之上自負自得不知素王之王者許希之罪人也因爲詩云
京城名利塗車馬相奔馳其間取富貴往往輸巫醫前後十數輩
身沒名已隳獨有許希者蘊蓄何瑰奇始自下蔡來所處尤喧卑
西市三十年汨汨無人知一朝仗至藝驟登文石墀三鍼愈上
疾神速不移時酬以六尚官著籍通端闈旌以三品服佩紫垂金
龜于時稱謝畢西向復陳儀當廳驚且問歷歷宣其辭臣傳扁鵲
術遇主今得施特此一展謝臣心不自私 主上惜其意繫賞爲
噓唏仍給水衡錢國西命立祠復加靈應號金額照華轅自此輦
轂下求禱何祁祁我過慶城坊見之心且悲秦醫術雖妙五腑及
四肢所習得其人千齡祀不虧魯聖術至大帝道與民彝所習非
其人一朝反相持小吏師荀况竊爲辯說資作相勸焚書詐云愚
蚩蚩後之爲儒者其心皆李斯昔在布衣日動守先王規朝談十

二經夕誦三百詩依憑稽古力榮進無他歧及居廟堂上劔長冠
峩巍自謂天所賦焉知有宣尼宣尼斷襲封十經寒暑移他姓爲
邑官鄉老皆驚疑上章寢不報九重遭面欺諫官不舉失御史不
言非盡爲許希笑得路忘先師

東州逸黨

顏太初

天之有常度躔次絕乖離地之有常理沈潛無變虧人之有常道
高下遵軌儀三才各定位萬古永不移二儀設有變修德可以祈
人道或反常其亂何由支昔在典午朝國祚向陵夷日向中夜出
赫赫來東陲地向太極裂中有蒼鵠飛高厚災且異人妖亦繁滋
始有竹林民怪誕名不羈次有夷甫輩高談慕無爲沈湎多越禮
阮籍兼輔之虛名能飾詐光逸與王尼何曾有先見不能救其衰
張華徒竭力無以扶其危至今西晉書讀之堪涕洟爾來歷千年
炎宋運重熙東州有逸黨尊大自相推號曰方外友蕩然絕四
維六籍被詆訶三皇遭毀訾坑儒愚黔首快哉秦李斯與世立憲

度迂哉魯先師流宕終忘反惡聞有民彝或爲童牧飲垂髮以相
嬉或作概量歌無非市井辭或作薤露喝發聲令人悲或稱重氣
義金帛不爲貨或曰外形骸頂踵了無絲塵聚復擾雜何者爲尊
卑遙聞風波民未見如調飢偶逢紳帶士相對如拘縻不知二紀
來此風肇自誰都緣極顯地多用寧馨兒斯人之一唱翕然天下
隨斯人之一趨靡然天下馳鄉老爲品狀不以逸爲嗤宗伯主計
偕不以逸爲非私庭訓弟子多以逸爲宜公朝論人物翫以逸爲
奇家國盡爲逸禮法從何施我常病其事中夜起思惟平地三尺
限空車登無歧重載歷百仞所來因陵遲萬一染成俗雖悔何由
追眾人皆若夢焉能分其麋眾人皆若醉不知啜其醪天下皆病
痿俾誰就魯醫天下皆病狂何暇灸其眉幸有名教黨可與決雄
雌所嗟九品賤不得立文墀賈誼唯慟哭梁鴻空五噫終削南山
竹冒死指其疵願乘九廟靈感悟宸心知赫爾奮獨斷去邪在勿
疑分捕復大索儉人無才遺大者肆朝市其徒竄海湄殺一以戒

萬是曰政之基千奴共一膽膽破眾自隳無使永嘉風敗亂昇平
時

贈張績禹功

石介

李唐元和閒文人如蠶起李翱與李觀言雄破姦宄孟郊及張籍
詩苦動天地持正不退讓子厚稱絕偉元白雖小道爭名愈弗已
卒能霸斯文昌黎韓夫子吾 宋興國來文人如櫛比黃州才專
勝漢公氣全粹晦之號絕羣平地走虎兕謂之然駁雜亦文中騏
驥曰稗洎盧震江沱自爲水朱巖兼孫僅培塿對嶽峙卒能霸斯
文河東柳開氏嗟吁河東沒斯文乃屯否汨汨三十年淫哇滿人
耳粵從景祐後大儒復唱始文人如麻立縱橫攢戰騎徂徠山磊
柯生民實頑鄙容貌不動人心膽無有比不度蹄涔微直欲觸鯨
鯉有慕韓愈節有肩柳開志今讀禹功文矛戟寒相倚寶光千里
高飛出破屋裏龍音萬丈長拔出重淵底雷霆皆藏身日星或失
次我慙年老大才力漸衰矣禹功氣奔壯今方二十二前去吾之

年猶有十四歲今讀禹功文魂魄已驚悸更加十四年世應絕儔
類卒能霸斯文吾恐不在己禹功幸勉旃當仁勿讓爾

小孤山

劉敞

驚波觸南崖反怒射北壁蒼山與相排所謂小孤石蟠根萬仞淵
聳角百丈碧祠堂豁精嚴行旅進粉澤或云婦女神矜鬢頗有迹
吾知定名意似欲旌介特流俗失其真傳聞莫開釋居人私其利
禍福妄損益競爲媚妬說以誣聰明德先王拱山川禮典有廟食
柰何媚於寵屈己忘正直吾欲爲小孤作書解行客復恐不見從
嗟哉世多惑

雜詩效玉川體

劉敞

毀巢鳳不至竭澤龍不游賢者有所歸得非龍鳳儔周公下白屋
聖德被九州趙禹謝賓客漢朝以爲優澆淳不相襲用舍何其繆
苟徇一身利不爲萬姓謀哀彼杖杜詩死生遺道周

雜詩二首

劉敞

鑿井取泉飲上山採薇食豈不信憔悴所願皆我力泉也非難致
薇也不易得志士恥徒飽眾人苟所獲犧牲畏芻豢樊籠害羽翼
晤理宜在早無爲晚更惑

道薄德亦散功名爲時須用力世所賢守正眾云愚智者競蒿目
小人復邇圖悠悠三季後此風益已渝安知治未病舐痔而多車
堯舜無能名越哉已矣夫

示張直溫

劉敞

築山必使高鑿井必使深百正戒淺近盛德羞浮沈焉有尺寸枝
能棲垂天禽焉有升斗泉能容橫江鱗借茲論物理足以開君心
隘在容不足弱在力不任大道如路然固無古與今

朝乘

劉敞

朝乘日車出暮載星影還顛冥朝暮中出入咫尺閒已覺素志非
更知人理艱小利專欲速大德不踰閑

哀張子厚先生

司馬光

先生負材氣弱冠游窮邊麻衣揖鉅公決策期萬全謂言叛羌輩
坐可執而鞭意趣小參差萬金莫留連中年更折節六籍事精研
羲農訖周孔上下皆貫穿造次循繩墨儒行無少愆師道久廢闕
模範幾無傳先生力振起不絕尙聯緜教人學雖博要以禮爲先
庶幾百世後復觀三王前釋老比尤熾羣倫將蕩然先生論性命
指示令知天聲光動京師名卿爭薦延賓之石渠閣豈徒脩簡編
丞相正自用立有榮枯權先生不可屈去之歸卧堅孤嫠聚滿室
餽口耕無田欣欣茹藜藿皆不思肥鮮近應詔書起尋取病告旋
舊廬不能到丹旄風翩翩人生會歸盡但問愚與賢借令陽虎壽
詎足驕顏淵況於朱紫貴飄忽如雲煙豈若有清名高出太白巔
門人俱經帶雲梯會松阡厚終信爲美繼志仍須專讀經守一作書
舊學勿爲利祿遷好禮效古人勿爲時所一作俗牽修內勿修外執
中勿執偏當令洙泗風郁郁滿秦川先生儻有知無憾歸重泉

今古路

司馬光

出門道路多縱橫不可測我今欲遠行須問曾行客徐徐逢路人
借問青松側客曰今何往答之遊京國客乃指要路而言行有益
古路雖大道不如今路直但行今人路猶如假羽翼彼客別我去
獨自躊躇立爲見今古路信乃無苦忒今路足輪蹄古路多荆棘
欲行今人路恐背古人跡欲行古人路今人笑迂僻又擬不出門
柰何飢寒逼哀哀此時路悠悠蒼天色不避今人嫌路須行古陌
古陌雖然遠且保無蹶失勉哉自勉哉前去難之適不獲見楊朱
萬古凝愁魄

漢文帝

王安石

輕刑死人眾短喪生者偷仁孝自此薄哀哉不能謀露臺惜百金
灞陵無高邱淺恩施一時長患被九州

戴不勝

王安石

昔在宋王所皆非薛居州區區一不勝辛苦亦何求懷祿詎有恥
知命乃無憂此士自可憐能復識此不

司馬遷

王安石

孔鸞負文章不忍留枳棘嗟子刀鋸閒悠然止而食成書與後世
憤悱聊自釋領略非一家高辭殆天得雖微樊父明不失孟子直
彼欺以自私豈啻相十百

揚雄

王安石

孔孟如日月委蛇在蒼旻光明所照耀萬物成冬春揚子出其後
仰攀忘賤貧衣冠眇塵土文字爛星辰歲晚天祿閣強顏為劇秦
趨舍迹少迂行藏意終隣攘攘外逐物紛紛輕用身往者或可返
吾將與斯人

楊劉

王安石

人各有是非犯時為患害唯詩以譎諫言者得無悔汾王昔監謗
變雅今尙載末俗忌諱繁此理寧復在南山詠種豆議法過四罪
玄都戲桃花母子受顛沛疑似已如此況欲諄諄誨事變故不同
楊劉可為戒

日出堂上飲

王安石

日出堂上飲日西未云休主人笑而歌客子歎以愀指此堂上柱
始生在巖幽雨露飽所滋凌雲亦千秋所託願永久何言值君收
乃令卑濕地百蟻上窮鏤丹青空外好鎮壓已堪憂為君重去之
不使一蟻留蟻力雖云小能生萬虬蚘又能高其礎不爾繼者稠
語客且勿然百年等浮漚為客當酌酒何豫主人謀

我欲往滄海

王安石

我欲往滄海客來自河源手探囊中膠救此千載渾我語客徒爾
當還治崑崙歎息謝不能相看涕飈盆客止我且往濯髮扶桑根
春風吹我舟萬里空自存

少狂喜文章

王安石

少狂喜文章頗復好功名稍知古人心始欲老蠶耕低徊但忘食
邂逅亦專城仰慙冥冥士俯愧擾擾氓良夜未遽央青燈數寒更
撥書置左右仰屋慨平生

今日非昨日

王安石

今日非昨日昨日已可思明日異今日如何能勿悲當門五六樹
上有蟬鳴枝朝聽尚壯急暮聞已衰遲仰看青青葉亦復少華滋
萬物同一氣固知當爾為我友南山居笑談解人頤分我秋柏實
問言歸何時衣冠污窮塵苟得猶苦飢低徊歲已晚恐負平生期

田漏

王安石

占星昏曉中寒暑已不疑田家更置漏寸晷亦欲知汗與水俱滴
身隨陰屢移誰當哀此勞往往奪其時

送潮州呂使君

王安石

韓君揭陽居戚嗟與死隣呂使揭陽去笑談面生春當復進趙子
詩書相討論不必移鱷魚詭怪以疑民有若大顛者高材能動人
亦勿與為禮聽之汨彝倫同朝敘朋友異姓接昏姻恩義乃獨厚
懷哉余所陳

雜詠

王安石

懷王自墮馬賈傅至死悲古人事一職豈敢苟然為哭死非為生
吾心良不欺滔滔聲利閒絳灌亦何知

謝公墩

王安石

走馬白下門投鞭謝公墩昔人不可見故物尚或存問樵樵不知
問牧牧不言摩挲蒼苔石點檢屐齒痕想此絳長檣想此倚短轅
想此玩雲月狼籍盤與罇井逕亦已沒漫然禾黍村摧藏羊曇骨
放浪李白魂亦已同山邱緬懷蒔蘭蓀小草戲陳迹甘棠詠遺恩
萬事付鬼錄恥榮何足論天機自開闔人理孰畔援公色無懼喜
儻知禍福根涕淚對桓伊暮年無乃昏

同昌叔賦鴈奴

王安石

鴻鴈無定棲隨陽以南北嗟哉此為奴至性能懇惻人將伺其殆
奴輒告之亟舉羣寤而飛機巧無所得夜或以火取奴鳴火因匿
頻驚莫我捕顧謂奴不直嗷嗷身百憂泯泯眾一息相隨入繒繳
豈不聽者惑偷安與受給自古有亡國君看鴈奴篇禍福甚明白

寓言四首

王安石

不得君子居而與小人游疵瑕不相摩况乃禍釁稠高語不敢出
鄙辭強顏酬始云避世患自覺日已偷如無一齊人以萬楚人咻
云復學齊言定復不可求仁義多在野欲從苦淹留不悲道難行
所悲累身修

周公歌七月耕稼乃王術宣王追祖宗考牧與宮室甘棠能聽訟
召伯聖人匹後生論常高於世復何實
瞽瞍俗所共察察與世違違世有百善一疵惡皆歸就求無所得
猶以好名譏彼哉負且乘能使正日微
言失於須臾百世不可除行失几席間惡名滿八區百年養不足
一日毀有餘諒彼恥不仁戒哉惟厥初

遊土山示蔡天啟

王安石

定林瞰土山近乃在眉睫誰謂秦淮廣正可藏一牒朝予欲獨往
扶僊強登涉蔡侯聞之喜喜色見兩頰呼鞍追我馬亦以兩鯨挾

歛書付衣囊裹飯隨藥笈翛翛阿蘭若土木老山脅鼓鍾卧空曠
箕簞雕捷業升堂廊無主考擊誰敢輒坡陀謝公冢藏椁久穿劫
百金買酒地野老今行饒紉懷起東山勝踐比稠疊於時國累卵
楚夏血常喋外實備艱梗中仍費調變公能覺如夢自喻一蝴蝶
桓溫適自斃苻堅方天厭且可緩九錫寧當快一捷彼哉斗筭人
得喪易矜怯妄言履齒折吾欲刊史牒傷心新城埭歸意終難愜
漂搖五城舟尙想浮河楫千秋隴東月長照西州堞豈無華屋處
亦捉蒲葵蕙碎金諒可惜零落隨秋葉好事所傳玩空殘法書帖
清談眇不嗣陳迹恍如接東陽故侯孫少小同鼓篋一官初嶺海
仰視飛鳶跼窮歸放款段高卧停遠蹠牽襟肘卽見著帽耳纔壓
數椽危敗屋爲我炊陳澁雖無膏汚鼎尙有羹濡筴縱言及平生
相視開笑靨邯鄲枕上事且飲且田獵或昏眠委翳或妄走超躡
或叫號而寤或哭泣而魘幸哉同聖時田里老安帖易牛以寶劔
擊壤勝彈鋏追憐衰晉末此土方岌業強偷須臾樂撫事終愁慄

子雖天戮民有械無接糴翁今貧而靜內熱非復葉子衰極今歲
儻與雞夢協委蛻亦何恨吾兒已長鬣翁雖歲長我未見白可鑄
祝翁尙難老生理歸善攝久留畏年少譏我兩咕躡束火扶路還
宵明狐兔懾蔡侯雄俊士心懍形亦謀異時能飛鞋快若五陵俠
胡爲阡陌閒踈足僅相躡諒欲交轡語怯子不能嚼

夜夢與和甫別如赴北京時和甫作詩覺而有作因簡純

甫

王安石

水菽中歲樂鼎茵暮年悲同胞苦零落會合尙淒其況乃夢乖闊
傷懷而賦詩詩言道路寒乃似北征時叔兮今安否季也來何遲
中夜遂不眠輾轉涕流離老我孤主恩結草以爲期冀叔善事國
有知無不爲千里永相望昧昧我思之幸唯季優游歲晚相攜持
於焉可晤語水木有茅茨晚蘭佇歸憩遠屋正華滋

獨卧有懷

王安石

午鳩鳴春陰獨卧林壑靜微雲過一雨浙瀝生晚聽紅綠紛在眼

流芳與時競有懷無與言佇立鍾山暝

宋文鑑卷第十六

宋文鑑卷十六

三

宋文鑑卷第十七

五言古詩

分題得瘦木壺

呂公著

寄題徑山懷郎簡侍郎

張璠

過介甫歸偶成詩

曾鞏

劉景升祠

曾鞏

看白雲愛而成詩

狄遵度

哀老婦

李泰伯

悠悠西江水送李殿丞

王回

魯恭太師廟

韓維

服除送兄弟還都

韓維

靈溝道中

韓維

謁孔先生

韓維

下橫嶺望寧極舍

韓維

宋文鑑卷十七

景仁示去歲所賦菊屏菊塔二詩輒以一篇答之

韓維

讀書

傅堯俞

舉舉媚學子

王令

呼雞

王令

秋懷

王令

雜詩

王令

采選示王聖美葛子明諸友

王令

介亭

孫覺

讀魏世家

王安國

夏日獨居二首

王安國

堂上有遺羶

王安國

忘言

王安國

異服

王陶

采鳧茈

兵器

鄭獬

送同年蒲叔範察判杭州監酒

王疇

四事

邵雍

高竹

邵雍

巢鳥

張先

臨水

黃亢

次韻和子儀問蟬

黃庶

自警

范純仁

檢覆邾城早示同官及寄河南諸賢

劉攽

雜詩

劉攽

齊魯

劉攽

擬古

劉攽

漕舟

沈文通

題福唐津亭

分題得瘦木壺

陳烈
呂公著

天地產眾材任材謂之智棟桷與楹杙小大無有棄方者以矩度
圓者中規制嗟爾木之瘦何異肉有贅生成擁腫姿賦象難取類
矚括所不施鉤繩為爾廢大匠睨而往惻然乃有意孰非造化功
而終朽不器刻剔虛其中朱漆為之偽劑漿挹酒醴施用惟其利
犧象非不珍金罍豈不貴設之於楹階十目肯注視幸因左右容
反見謂奇異人之於才性夫豈遠於是性雖有不善在教之揉勵
才亡不可用由上所措置飾陋就其長皆得為良士執一以廢百
眾功何由備是惟聖人心能通天下志

寄題徑山懷郎簡侍郎

張瓌

天地一洲渚北平南敬危幽并深以厚江淞清且奇武林頗英秀
川匯仍山卑應接殫天巧類非人力為徑山最佳處有巖稱玉芝
居防俗士駕地乃賢人宜郎公留名德平時為羽儀引年歸故里
不復衣朝衣留侯黃石心白傅香山期結字名勝外日與塵事違
泉石景物狀盡任諸賢詩伊予來東藩濫持使者麾平生愛山水
弗憚命駕之當候秋風高遠造巖下屏澣濯纓上塵散步松間碁
未能繼高躅聊用慰所思

過介甫歸偶成

曾鞏

結交謂無嫌忠告期有補直道詎非難盡言竟多迂知者尚復然
悠悠誰可語

劉景升祠

曾鞏

景升得二蒯坐論勝凶殘正當喪亂時能使憔悴寬續紛多士至
肅穆萬里安能收眾材助圖大信不難諸公龍鳳姿有待久盤桓
得一固足興致之豈無端迺獨采樗櫟不知取椅檀蓋云器有極
在理良足歎

看白雲愛而成詩

狄遵度

秋風吹白雲觸處自何谷初猶半洞門歛出遍巖腹零落依水湄

片段掛枯木餘影透微白滅跡混空綠煙蘿自翳蒼島激徒縈曲
安知蒼梧野下覆猿鳥哭誰能久徘徊返顧視黃鵠

哀老婦

李泰伯

里中一老婦行行啼路隅自悼未亡人暮年從二夫寡時十八九
嫁時六十餘昔日遺腹兒今茲垂白鬚子豈不欲養母豈不懷居
絲役及下戶財盡無所輸異籍幸可免嫁母乃良圖牽車送出門
急若盜賊驅兒孫孫有婦小大攀且呼回頭與永訣欲死無刑誅
我時聞此言爲之長歎嗚天民固有窮鰥寡實其徒仁政先四者
著在孟軻書吾君務復古旦旦師黃虞赦書求節婦許與旌門
閭絜爾愚婦人豈曰禮所拘蓬茨四十年不知形影孤州縣莫能
察詔旨成徒虛而況賦役閒羣小所同趨姦欺至骨髓公利未錙
銖良田歲歲賣存者唯萊汙兄弟欲離散母子因變渝天地豈非
大曾不容爾軀嗟嗟孝治主早晚能聞諸吾言又無位反袂空漣
如

悠悠西江水送李殿丞

王回

殿中丞李侯清叔筦潁之酒事三年入朝闕下將別其往還寮友
皆索言焉長樂王回辱清叔之交最深而慕其才志魁特將有以
成功名於世也以謂挾此才潛此志者第循其本而完之則物之
應者自廣然功名之成否豈足道哉故作悠悠西江水詩一章以
興其義塞清叔之索而聊寫其意云

悠悠西江水浩浩拍兩涯深瀟含淵潭澄澄露陂池介鱗育性命
跳泳各適宜人謀濟任途航楫又沿洞飄風吼天地白浪相翻脰
旁觀駭非常水德自不虧風收浪還恬狎者終何疑賢豪應世務
有本亦若茲剛明發其用愷悌以成之外物雖橫來我心固如夷
功名豈足道請監江水詩

魯恭太師廟

韓維

善教邈無跡其流在民心君看魯太師廟食猶至今豈如文俗士
朱墨坐浮沈趨營止目前不顧患害深去漢餘千載此弊竟相尋

我行道祠下感激為悲吟不見田雉馴啼鴟空滿林

服除送兄弟還都 韓維

日月忽已遠再見新穀升喪期有常數吉我衣與纓俯仰自悲咤
淚下肝膽崩尚惟立身報未即泯餘生肅肅忠憲公秉德輔休明
報國有遺意訓言獨在聽況茲世厚恩兄弟秩王庭一朝出門去
事業各有營上當答君仁下以為親榮獨此抱痾瘵謝喧守柴荆
埽塚奉時祭復田課春耕既無公家責聊狗狷者情出處雖云異
要以道為程

靈溝道中 韓維

春風來無跡泱莽天地和羣生樂時陽眾鳥舞且歌嗟爾道傍叟
寒餒獨見羅短席不自蔽皮骨撐枯柯呼童問所以口噤不得哦
所見且如此況餘生齒多吾聞古三代仁術固匪他老幼孤泊疾
餼養平不頗斯道久寂寞吾悲其奈何

謁孔先生 韓維

月出高樹枝影動酒樽處樹深月色薄稍以燈火助主久喜我過
斟酌亦云屢於時幸無累所談非近務涼風自遠至清景淡吾慮
方斯西山秋歷覽陪杖屨

下橫嶺望靈極舍 韓維

驅車下峻坂西走龍陽道青煙人幾家綠野山四抱烏啼春意闌
林變夏陰早應近先生廬民風亦淳好

景仁示去歲所賦菊屏菊塔二詩輒以一篇答之 韓維

斯民去古遠日與巧偽遷粲粲黃金花揉屈同杯捲列屏聳浮圖
光彩生盤筵匪惟悅羣兒愛詠及華顛我欲叱園吏解結除其編
萬物有本性各使歸自然

讀書 傅堯俞

吾屋雖喧卑頗不甚蕪穢置席屋中閱坐卧羣書內橫風吹急雨
入屋洒我背展卷殊未知心與昔人會有客自外來笑我若癡昧

且問何爲爾我初尙不對強我不得已起答客亦退聊復得此心
沾溼安足悔

舉舉媚學子

王令

舉舉媚學子居曰不吾知知而有不能無乃失於欺不知未爲患
不欺浩難期咄哉天下懷何以天下爲

呼雞

王令

雞呼雞來前犬嗾犬至止夫豈必可召役以食乃爾今吾曷爲悲
人而雞犬爲自計無自存西山謝夷齊

秋懷

王令

槭槭庭樹葉朝零非昔稠叻草蟲鳴暮急曉未休爾蟲無不平
豈亦有哀憂胡爲勞呻吟與士感傷投壯士亦何者哀哦與蟲酬
所抱不列陳調苦難謠謳極目有遠見直懷羞曲求蒿藜襲久安
功名忘前收日月忽未幾天地今復秋少壯負所懷老大安能謀
生無及人功死骨埋泉羞胡爲不奮飛徒與寒餓讐

雜詩

王令

古人重非道飢不苟豆羹有爲非其心或不脫冕行如何後世人
以官業其生鄙哉樂欺人猶以學爲名

采選示王聖美葛子明諸友

王令

酒樽厭運行眾客喧已醉忽得簿上籍共出聲名外孤昂忽雄軒
泯默亦馴致追爭相後先得失自愚智隨時有能稱逐覺得訶訾
雖非人力爲適與天幸值或競以禍覆亦有終自遂卒無及物效
徒有高人氣回樽變新局忽若已異世嗟人久以迷高爵樂自嗜
誰爲衍衍飽競逐孜孜利矜驕侈雄奢摧折嘆淹滯昏昏忘所大
擾擾爭其細安知茫昧閒身非天所戲是非未暇辨歡戚先已至
退之昔裁詩頗以豪橫恃暮年意氣得金玉多自慰買居紀廂榮
顧影樂冠佩喜將閭巷好特與妻子議彼哉何足道進退茲焉係
安知九列榮顧是德所累寧論聖人爲適莫固以義有時曲肱樂
不以易富貴吾曹頗勉脩茲道久自詣何必問浮雲斯理固可視

介亭

孫覺

真人昔未起奔鹿駭四方連延天目山雨乳百里長有地跨江海
無種生侯王中霄燎穹旻列石表壇場朱旗大梁野英氣吞八荒
寥寥百年後故物亦已亡所餘彼巉巖峯巔屹相望主人承明老
星斗工文章築亭紫霄上坐客蒼林旁攀雲弄明月曉星生扶桑
禹山隔波濤簡書永埋藏願逢希夷使水土還故常

讀魏世家

王安國

亶亶談先生古今誰有得施為雖緒餘要在情不匿嗟彼三代後
淪胥入戰國翟璜聞一言僂俛慙李克論材稱權衡輕重無物惑
吾心能如此乃可任人責

夏日獨居二首

王安國

竹笛敷夏陰蘿蔓蔽朝亮感此節物佳百骸適無恙委蛇投廣厦
蕭瑟絕遺響稍讐簡編餘俄得冠裾放身雖勢利乖心遂弦歌尚
默然想聖賢游世無得喪抱關秉翟閒未分棄冗長人生適意難

聊各安所鄉

暫暫池沼條綠萍隨下上鱉鱉堂庶燕白晝容俛仰顧我亦晏如
環廬花藥長無材助太平得地幸閒曠稍披千古書日覺神明王
乘閒盼物情自適忘外獎涵濡覆載仁誰廢魚麗唱黃塵洮隴戍
黑霧荆衡饒奔波喝道邊畢命營邊障吾此獨何為飛潛樂能饗
何時聞解嚴慰彼西南望當使少陵翁得見廉恥將

堂上有遺羶

王安國

堂上有遺羶堂下無聚蟻但知嗜欲求不必風雨至客方笑營營
貪得故無幾安知萬類中趨舍忘彼己天平顧人寰等是一時戲
受形巨細分貼患後先爾浸淫蚍蜉生穴柱從此始莊生亦知言
信矣當棄智

忘言

王安國

宋國旌孝子東門毀以斃楚王好細腰後宮餒而殪物情信可憐
徇外易生死身存寵可誇亡矣安所恃吾今思彼哉未足語擇利

擾擾智驚愚卑卑學阿世吹噓出虹蜺頓挫入塵滓愛憎雖人爲
榮辱乃天使恩無斯須懷怨已塞天地百年呼吸中毫髮誰豫已
適者默然窺陰陽驅意氣始終本何有一息累萬世由來適人適
宿昔多如此喟余聊自欲安得忘言士

異服

王陶

辛有歎被髮趙靈喜胡服遂成陸渾戎終有沙邱辱用夷反變夏
亡禮以從俗先王仁義術詎用此求福齊桓九合功不以兵車穀
仲尼歎微管幾爲左衽爾來豪俠兒往往異裝束耀武何必然
禦戎有前躅余敢告司關異服宜禁肅

采鳧茨

鄭獬

朝攜一筐出暮攜一筐歸十指欲流血且急眼前飢官倉豈無粟
粒粒藏珠璣一粒不出倉倉中羣鼠肥

兵器

陶弼

五代乏眞主奸雄何僭僞橫磨閻刀劔白日相纂弒我宋有神

祖潛德動天意故天意若曰往爲我之嗣神祖拜稽首乃卽皇
帝位不惠兆民樂不怒諸侯畏顛倒執玉帛奔走恐後至大商國
三分一朝有其二太宗以義撫眞宗以仁治王道竹箭直誦
聲金鼎沸獨有陰山戎時時寇邊地天子赫斯怒大警巡澶衛
射殺右賢王遂斷匈奴臂狼心帖然服結好同昆弟自此兩河閒
寂寂無戎備卒閑喜夜歌將老貪春睡自此爲太平恍逾三十歲
戎吳乘我閒南馳賀蘭騎陽關久夜開樞朽不可閉陣雲起秦雍
殺氣橫涇渭使臣股慄奏宰相曠日議僉曰亟發兵豎子坑甚易
倉惶築邊壘未戰力先瘁逼迫開庫兵土蝕鋒鏃脆防秋采舊屯
推轂謀新寄舊屯老且死少者無實藝良由不訓練手足迷擊刺
新寄將家子從小生富貴六韜未嘗讀口但知肉味師復從中御
進退由闡寺權輕號令冗兩戰無遺類曹公棄七軍晉人獲三帥
吾兵自此喪有詔新其製此器不預設一旦何從致朝廷急郡縣
郡縣急官吏官吏無它術下責蚩蚩輩耕牛拔筋角飛鳥禿翎翅

斡截會稽空鐵烹堇山碎供億稍後期鞭扑異他罪愁氛壅太虛
霽景晝冥晦我聞郭汾陽料敵多奇異單筆論突厥蕃酋膝雙墜
又聞李西平臨戎有英氣身著紅錦袍懷光肝膽碎是知用兵術
在人不在器君耳舜高聽君目舜明視願采謀略長勿倚干戈銳

送同年蒲叔範察判杭州監

王疇

釋之久未調王粲嘗從軍謂言塞垣事壯氣橫風雲育材幸明代
薦賢無令君如何漢酷冗沉此荆山珍萍氏本幾酒周官有舜倫
孝武事攘卻志清天地屯連兵無時已四海蕭然貧官始操釀具
榷之飽師人利源一以洩頽波蕩無垠糜穀費耒耜良莠爭清醇
酒禁著律令犯笞及其身狂藥乃陷奔傷哉堯舜民炎靈屬我
后天資英且仁邦力早雄富漢制仍相循歲賦二千萬經入固已
勤大農天下酒利彌年擁武節乘邊清國氛雄雄百萬師跨邁聯
燕秦仰給傾府庫賞賚圖戎勳加斂猶不足返古當何云杭城東
南劇地將湖海鄰榷利冠天下旗亭壓重圍彼雖斗筲職亦擇才

英臣風露氣已肅溪潭寒彌新沙榜朝泛泛吳濤暮云云南州近
牛斗氣象雄霜旻汀楓變老枿赤葉晴相紛嘗茶泊幽寺觀魚下
輕艖行當收翹楚寧復混蒸薪無爲狎吳叟坐戀秋江蓴

四事

邵雍

會有四不赴時有四不出公會生會廣會醜會無貴亦無賤無固
亦無必里閑閑過從身安心自逸如此三十年幸逢太平日

高竹

邵雍

高竹碧相倚自能發餘清時時微風來萬葉同一聲道污得夷理
物虛含遠情階前閑步人意思何清平

巢鳥

張先

鳥啼東南林危巢雛五六心在安巢枝一日千往復脫網得羣食
入口不入腹窮生俾反哺豈能報成育

臨水

黃亢

人生朝復暮水波流不駐去年昨日水今日到何處惆悵雨殘花

媽紅隨水去花落水東流識盡人生事

次韻和子儀問蟬

黃庶

落日掛樹閒長我亭下陰園林動秋意高蟬忽微吟清風轉餘聲
杳若下遠岑微物感時節鏗鉤吐商金古樂久破碎茲蟲抱金音
荒忽尚偃蹇激起壯士心願為秋蟬操被之朱絲琴

自警

范純仁

憶昔為小官位卑職易營朋知喜其勤民口亦見稱中間忝臺諫
已覺言難行然賴識者恕尚謂無敬傾數年忽遭遇用大過其能
名虛稱不實任重力難勝具瞻不可欺舉動招譏評士論因不與
自知亦甚明祿厚難報答徒茲驕侈萌子孫忘艱難服用饒誇矜
清白素風滅冗長浮費增親舊多責望厚薄貽怨憎貧賤勝富貴
古語信可憑請病蒙罷免方幸憂責輕俄復統一道撫民帥邊兵
寇狂適偃蹇民疲未蘇醒勝負繫司命休戚及羣氓細務委將佐
大事稟朝廷所稟有違從委擇有不精差失雖豪釐致敗或邱陵

殞身何足道誤國玷家聲可不常惕懼臨淵履春冰庶幾免危溢
書此為心銘

檢覆邾城旱田示同官及寄河南諸賢

劉攽

昔歲歉無年今夏仍薦飢罷民去南畝賤價捐東菑藉藉道路閒
餓者何纍纍藜藿不充腸藪然旄與倪嗟我祿代耕每食為不怡
徒懷仲由志身賤那得施屬城上民訟比牒皆苦詞奉詔實有無
百聞謝一窺星言說桑田行與父老期觸熱不敢休重趼寧告疲
郊原赤如赭秉穗無子遺獲藝不可分四旁生蒺藜流行誠代有
愚弱豈易欺附上亦有刑殘下罪攸司鄙夫不忍此告吏咸赦之
庶茲咻噢恩足以蘇惛瘖大農急經費言利析毫釐二吾猶不足
一切寧謂宜國僑敏爭承鄭邑用不危馮煖焚券書田氏人若歸
區區二小邦兩士能若斯當官在必行匪石安可移諸公悉吾友
此志良弗非當令徇路人一聽狂者詩

雜詩

劉攽

齊有梁邱據晉有樂王鮒據能愛晏嬰鮒欲殘叔譽二臣嬖兩朝
事君爲悅豫景有尙賢志據逆以爲助平失宥善心鮒乃速其去
毋以據爲賢易地則同趣丈夫處世間必有遇不遇豈無覺者乎
正色君亦悟區區嬖幸徒何忍就朋附

齊魯

劉放

齊魯大儒師專門盛章句應物非己長何以責成務乃其忠孝心
足以事君父不如商利徒反道趨詭遇剝牀以及膚泉貨山嶽聚
賜金再百斤封邑成千戶若毋天事變豈不厚且固商鞅旣誅夷
桑羊亦刀鋸寄言逢衣人施施幸安步

擬古

劉放

老萊隱窮楚因與時世隔暮歸怪車轍夜起辟山澤若人不可見
況肯低顏色安知叢臺下一旦三千客西遷竟不還嗟哉莫良畫

漕舟

劉放

漕舟上太倉一鍾直千金太倉無陳積漕舟來無極畿兵已十萬

三垂成更多廟堂方濟師將柰東南何

題福唐津亭

陳烈

溪山龍虎蟠溪水鼓角喧中宵鄉夢破六月夜衾寒風雨生殘樹
蛟龍喜怒瀾慙勤祝舟子移棹過前灘

宋文鑑卷第十七

宋文鑑卷第十八

五言古詩

懷賢閣

和子由記園中草木二首

調水符

贈劉莘老

甘露寺

垂雲寺

西齋

司馬君實獨樂園

除夜病中贈段屯田

和頓教授見寄

京師哭任遵聖

張寺丞益齋

蘇蘇蘇蘇蘇蘇蘇蘇蘇蘇蘇蘇蘇蘇
軾軾軾軾軾軾軾軾軾軾軾軾軾軾軾軾

送鄭戶曹

蘇軾

懷西湖寄晁美叔同年

蘇軾

送李公擇

蘇軾

種松得徠字

蘇軾

以雙刀遺子由子由有詩次其韻

蘇軾

與王郎昆弟及兒邁遠城觀荷花二首

蘇軾

送俞節推

蘇軾

東坡七首

蘇軾

冬至日贈安節

蘇軾

陳季常見過三首

蘇軾

初秋寄子由

蘇軾

過建昌李野夫公擇故居

蘇軾

栖賢三峽橋

蘇軾

高郵陳直躬處士畫鴈

蘇軾

次韻王覲正言喜雪

蘇軾

故李承之待制六丈挽詞

蘇軾

送范純粹守慶州

蘇軾

送千乘千能兩姪還鄉

蘇軾

故周茂叔先生濂溪

蘇軾

歐陽叔弼見訪道陶淵明事因語及元載

蘇軾

竹閒亭小酌懷叔弼季弼

蘇軾

東府雨中別子由

蘇軾

過高郵寄孫君孚

蘇軾

次韻定慧欽老見寄

蘇軾

江月五首

蘇軾

遷居之夕聞鄰居兒請誦書

蘇軾

次韻子由所居

蘇軾

和陶淵明飲酒

蘇軾

和陶淵明怨詩

蘇軾

和陶淵明雜詩

蘇軾

和陶淵明庚戌歲九月中於西田穫早稻

蘇軾

和陶淵明始作鎮軍參軍經曲阿

蘇軾

和陶淵明詠三良

蘇軾

和陶淵明貧士

蘇軾

夏晝

章望之

宿簡寂觀

袁陟

再遊雲居

袁陟

覆驗餘姚道中

王存

雜興三首

鮮于侁

新堂夜坐

鮮于侁

海州觀放鵲搏兔不中而飛去

沈括

觀餘姚海氛

謝景初

餘姚董役海堤有作

謝景初

法喜堂

謝景初

村居

文與可

新晴山月

文與可

屬疾桐軒

文與可

北山僧舍有閣曰懷賢南直斜谷西臨五丈原諸葛孔明

所從出師也

蘇軾

南望斜谷口三山如犬牙西觀五丈原鬱屈如長蛇有懷諸葛公

萬騎出漢巴吏士寂如水蕭蕭聞馬過公才與曹丕豈止十倍加

顧瞻三輔閒勢若風捲沙一朝長星墜竟使蜀婦髻山僧豈知此

一室老煙霞往事逐雲散故山依渭斜客來空弔古清淚落悲笳

和子由記園中草木二首

蘇軾

種柏待其成柏成人亦老不如種叢筍春種秋可倒陰陽不擇物

美惡隨意造柏生何苦艱似亦費天巧天工巧有幾肯盡為汝耗

君看藜與藿生意常草草

蘆筍初似竹稍開葉如蒲方春節抱甲漸老根生鬚不愛當夏綠
愛此及秋枯黃葉倒風雨白花搖江湖江湖不可到移植苦勤劬
安得雙野鴨飛來成畫圖

愛玉女洞中水既致兩餅恐後復取而爲使者見給因破
竹爲契使寺僧藏其一以爲往來之信戲謂之調水符

蘇軾

欺謾久成俗關市有契繻誰知南山下取水亦置符古人辨淄澠
皎若鶴與鳧吾今既謝此但視符有無常恐汲水人智出符之餘
多防竟無及弃置爲長吁

贈劉莘老

蘇軾

江陵昔相遇幕府稱上賓再見明光宮峩冠挹搢紳如今三見子
坎河爲逐臣朝遊雲霄閒欲分丞相茵莫落江湖上遂與屈子鄰
了不見喜愠子豈真可人邂逅成一歡醉語出天真士方在田里

自比渭與莘出試乃大謬芻狗難重陳歲晚多霜露歸耕當及辰

甘露寺

蘇軾

欲遊甘露寺有二客相過遂與偕行寺有石如羊相傳謂之很石
云諸葛孔明坐其上與孫仲謀論曹公也大鐵鑊二案銘梁武帝
所鑄畫師子一菩薩二陸探微筆李衛公所留祠在寺手植柏合
抱矣近寺僧發古殿基得舍利七粒并石記乃衛公爲穆宗皇帝
造福所葬者也

江山豈不好獨遊情易闌但有相攜人何必素所歡我欲訪甘露
當途無閑官二子舊不識欣然肯聯鞍古郡山爲城層梯轉朱欄
樓臺斷崖上地窄天水寬一覽吞數州山長江漫漫卻望大明寺
惟見煙中竿很石卧庭下穹隆如伏羶緬懷卧龍公挾策事瑯嶞
一談收獬子再說定老瞞名高有餘想事往無留觀蕭公古鐵鑊
相對空團團坡陀受百斛積雨生微瀾泗水逸周鼎渭城辭漢盤
山川失故態怪此能獨完僧繇六化人霓衣挂冰紈隱見十二疊

觀者疑夸謾破板陸生畫青猊戲盤跚上有二天人揮手如翔鸞
筆墨雖欲盡典刑垂不刊赫赫贊皇公英姿凜以寒古柏親手種
挺然誰敢干枝撐雲峯裂根入石窟蟠薙草得斷碑斬崖出金棺
瘞藏豈不牢見伏理可歎四雄皆龍虎遺迹儼未刊方其盛壯時
爭奪肯少安廢興屬造物遷逝誰控搏況彼妄庸子而欲事所難
古今共一軌後世徒辛酸聊興廣武歎不待雍門彈

僧清順新作垂雲寺

蘇軾

江山雖有餘亭榭著難穩登臨不得要萬象各偃蹇惜哉垂雲軒
此地得何晚天功爭向背詩眼巧增損路窮朱欄出山破石壁很
海門浸坤軸湖尾抱雲巘蔥蔥城郭麗淡淡煙村遠紛紛烏鵲去
一一漁樵返雄觀快新獲微景收昔道人真古人嘯咏慕嵇阮
空齋卧蒲褐芒履每自緬天憐詩人窮乞與供詩本我詩久不作
荒澁旋鋤墾從君覓佳句咀嚼廢朝飯

西齋

蘇軾

西齋深且明中有六尺牀病夫朝睡足危坐覺日長昏昏既非醉
踽踽亦非狂褰衣竹風下穆然中微涼起行西園中草木含幽香
榴花開一枝桑棗沃以光鳴鳩得美蔭困立志飛翔黃鳥亦自喜
新音變圓吭杖藜觀物化亦以觀我行萬物各得時我生日皇皇

司馬君實獨樂園

蘇軾

青山在屋上流水在屋下有五畝園花竹秀而野花香襲杖屨
竹色侵盞斝樽酒樂餘春棊局消長夏洛陽古多士風俗猶爾雅
先生卧不出冠蓋傾洛社雖云與眾樂中有獨樂者才全德不形
所貴知我寡先生獨何事四海望陶冶兒童誦君實走卒知司馬
持此欲安歸造物不我捨名聲逐吾輩此病天所赭撫掌笑先生
年來效喑啞

除夜病中贈段屯田

蘇軾

龍鍾三十九勞生已強半歲暮日斜時還爲昔人歎
樂天詩云行年三十九歲
斜時今年一線在那復堪把玩欲起強持酒故交雲雨散惟有病

相尋空齋爲老伴蕭條燈火冷寒夜何時且勸僕觸屏風飢鼯嗅
空案數朝閉閣卧霜髮秋蓬亂傳聞使者來策杖就梳盥書來苦
安慰不怪造請緩大夫忠烈後高義金石貫要當擊權豪未肯覩
衰懦此生何所似闇盡灰中炭歸田計已決此邦聊假館三徑粗
成貲一枝有餘煖願君更信宿庶奉一笑粲

和頓教授見寄

蘇軾

我笑陶淵明種秫二頃半婦言旣不用還有責子歎無絃則無琴
何必勞撫玩我笑劉伯倫醉髮蓬散二豪苦不納獨以鍤自伴
旣死何用埋此身同夜且孰云二子賢自結兩重案笑人還自笑
出口談治亂一生溷塵垢晚以道自盟無成空得懶坐此百事緩
側聞頓夫子講道出新貫豈無一尺書恐不記庸懦陋邦貧且病
數米銖稱炭慙愧章先生十日坐空館袖中出子詩貪讀酒屢煖
狂言各須慎勿使輸薪粲

京師哭任遵聖

蘇軾

十年不還鄉兒女日夜長豈惟催老大漸復成凋喪每聞耆舊亡
涕泣聲輒放老任況奇逸先子推輩行文章少得譽詩語尤清壯
吏能復所長談笑萬夫上自喜作劇縣偏工破豪黨奮走猾吏
嚼齒對姦將哀哉命不偶每以才得謗竟使落窮山青衫就黃壤
宦遊久不樂江海永相望退耕本就君時節相勞餉此懷今不遂
歸見纍纍葬望哭國西門落日銜千嶂平生唯一子抱負珠在掌
見之齟齬中已有食牛量他年如入洛生死一相訪惟有王濬冲
心知中散狀

張寺丞益齋

蘇軾

張子作齋舍而以益爲名吾聞之夫子求益非速成譬如遠游客
日夜事征行今年適燕薊明年走蠻荆東觀盡滄海西涉渭與涇
歸來閉戶坐八方在軒庭又如學醫人識病由飽更風雨晦明淫
跛躄瘖聾盲虛實在其脉靜躁在其情榮枯在其色壽夭在其形
苟能閱千人望見知死生爲學務日益此言當自程爲道貴日損

此理在既盈願君書此詩以爲益齋銘

送鄭戶曹

蘇軾

水遶彭城樓山圍戲馬臺古來豪傑地千載有餘哀
隆準飛上天重瞳亦成灰白門下呂布大星隕臨淮
尙想劉德輿置酒此徘徊爾來苦寂寞廢圃多蒼苔
河從百步響山到九里回山水自相激夜聲轉風雷
蕩蕩清河濤黃樓我所開秋月墮城角春風搖酒盃
遲君爲坐客新詩出瓊瑰樓成君已去人事固多乖
他年君倦游白首賦歸來登樓一長嘯使君安在哉

送李公擇

蘇軾

嗟余寡兄弟四海一子由故人雖云多出處不我謀
弓車無停招逝去勢莫留僅存今幾人各在天一畝
有如長庚月到曉爛不收宜我與夫子相好手足侔
比年兩見之賓主更獻酬樂哉十日飲衍衍和不流
論事到深夜僵仆鈴與騶頗嘗見使君有客如此不
欲別不忍言慘慘集百憂念我野夫兄知名三十秋
已得其爲人

不待風馬牛他年林下見傾蓋如白頭

懷西湖晁美叔同年

蘇軾

西湖天下景遊者無愚賢深淺隨所得誰能識其全
嗟我本狂直早爲世所捐獨專山水樂付與寧非天
三百六十寺幽尋遂窮年所至得其妙心知口難傳
至今清夜夢耳目餘芳鮮君持使者節風采爍雲煙
清流與碧巘安肯爲耳妍胡不屏騎從暫借僧榻眠
讀我壁間詩清涼洗煩煎策杖無道路直造意所便
應逢古漁父葦間自延緣問道若有得買魚勿論錢

種松得徠字

蘇軾

春風吹榆林亂葉飛作堆荒園一雨過戢戢千萬栽
青松種不生百株望一枚一枚已有餘氣壓千畝槐
野人易斗粟云自魯徠徠魯人不知貴萬竈飛青煤
束縛同一車胡爲乎來哉泣然解其縛清泉洗浮埃
枝葉傷尙困生意未肯回山僧老無子養護如嬰孩
坐待老龍蛇清陰滿南臺孤根裂山石直幹排風雷
我今百日客

養此千歲材時去替茯苓無消息雙鬢日夜催古今一俛仰作詩寄餘哀

以雙刀遺子由有詩次其韻

蘇軾

寶刀匣不見但見龍雀環何曾斬蛟虵亦未切琅玕胡爲穿箭輩見之要領寒吾刀不汝問有愧在其肝念此刀自藏包之虎皮斑湛然如古并終歲不復瀾不憂無所用憂在用者難佩之非其人匣中自長歎我老眾所易屢遭非意干惟有王玄通塔庭秀芝蘭知子後必大故擇刀所便屠狗非不用一歲六七刃欲試百鍊剛要須更泥蟠作詩銘其背以待知者看

與王郎昆仲及兒邁遠城觀荷花二首

蘇軾

昨夜雨鳴渠曉來風襲月蕭然欲秋意溪水清可啜環城三十里處處皆佳絕蒲蓮浩如海時見舟一葉此閒真避世青莠低白髮相逢欲相問已逐鷺鷥沒

清風定何物可愛不可名所至如君子草木有嘉聲我行本無事

孤舟任斜橫中流自偃仰適與風相迎舉杯屬浩渺樂此兩無情歸來兩溪閒雲水夜自明

送俞節推尚之子尚字退翁

蘇軾

吳興有君子淡如朱絲琴一唱三歎息至今有遺音嗟余與夫子相避如參辰退翁官于蜀余在京師余歸而退翁去及余官于吳興則退翁亡矣猶喜見諸郎窈然清且深異時多良士末路喪初心我生不有命其肯枉尺尋

東坡七首

蘇軾

余至黃二年日以困置故人馬正卿哀余乏食爲於郡中請故營地數十畝使得躬耕其中地既久荒爲茨棘瓦礫之場而歲又大旱墾闢之勞筋力殆盡釋耒而歎乃作是詩自愍其勤庶幾來歲之入以忘其勞焉

廢壘無人顧頽垣長蓬蒿誰能捐筋力歲晚不償勞獨有孤旅人天窮無所逃端來拾瓦礫歲旱土不膏崎嶇草棘中欲刮一寸毛喟然釋耒歎我廩何時高

荒田雖浪莽高庫各有適下隰種杭稌東原蒔棗栗江南有蜀士
桑果已許乞好竹不難栽但恐鞭橫逸仍須卜佳處規以安我室
家僮燒枯草走報暗井出一飽未敢期瓢飲已可必

自昔有微泉來從遠嶺背穿城過聚落流惡壯蓬艾去為柯氏陂
十畝魚蝦會歲旱泉亦竭枯萍黏破塊昨夜南山雲雨到一犁外
泫然尋故瀆知我理荒營泥芹有宿根一寸嗟獨在雪芽何時動

春鳩行可贈蜀人貴芽贈

種稻清明前樂事我能數毛雨暗春澤鍼水聞好語蜀人以細雨

生時農夫相分秧及初夏漸喜風葉舉月明看露上一一垂珠縷

秋來霜穗重顛倒相撐拄但聞畦隴閒蚱蜢如風雨蜀中稻熟時

聞如小蝗狀新春便入甌玉粒照筐筥我久食官倉紅腐等泥土

行當知此味口腹吾已許

良農惜地力幸此十年荒桑柘未及成一麥庶可望投種未逾月
覆塊已蒼蒼農夫告我言勿使苗葉昌君欲富餅餌要須縱牛羊

再拜謝苦言得飽不敢忘

種棗期可剝種松期可斲事在十年外吾計亦已愨十年不足道

千載如風雹舊聞李衡奴此策疑可學我有同舍郎官居在灤岳

李公遺我三寸柑照坐光卓犖百栽儻可致當及春冰渥想見竹

離也離閒青黃垂屋角

潘子久不調沽酒江南村郭生本將種賣藥西市垣古生亦好事

恐是押牙孫家有十畝竹無時容叩門我窮交舊絕三子獨見存

從我於東坡勞餉同一飧可憐杜拾遺事與朱阮論吾師卜子夏

四海皆弟昆

冬至日贈安節

蘇軾

我生幾冬至少小如昨日當時事父兄上壽拜脫膝十年閱凋謝

白髮催衰疾瞻前惟兄三顧後子由一近者隔濤江遠者天一壁

今朝復何幸見此萬里姪憶汝總角時啼笑為梨栗今來能慷慨

志氣堅鐵石諸孫行復爾世事何時畢詩成卻超然老淚不成滴

陳季常見過二首

蘇軾

仕宦常畏人退居還喜客君來輒館我未覺雞黍窄東坡有奇事
已種十畝麥但得君眼青不辭奴飯白
送君四十里只使一帆風江邊千樹柳落我酒盃中此行非遠別
此樂固無窮但願長如此來往一生同

初秋寄子由

蘇軾

百川日夜逝物我相隨去惟有宿昔心依舊守故處憶在懷遠驛
閉門秋暑中藜羹對書史揮汗與子同西風忽淒厲落葉穿戶牖
子起尋袂衣感歎執我手朱顏不可恃此語君勿疑別離恐不免
功名定難期當時已悽斷況此兩衰老失途既難追學道恨不早
買田秋已議築室春當成雪堂風雨夜已作對牀聲

過建昌李野夫公擇故居

蘇軾

彭蠡東北源廬阜西南麓何人脩水上種此一雙玉思之不可見
破宅餘脩竹四鄰戒莫犯十畝森似束我來仲夏初解籜呈新綠

幽鳥向我鳴野人留我宿裴回不忍去微月挂喬木遙想他年歸
解組巾一幅對牀老兄弟夜雨鳴竹屋卧聽鄰寺鍾書窗有殘燭

栖賢三峽橋

蘇軾

吾聞太山石積日穿綫溜況此百雷霆萬世與石鬪深行九地底
險出三峽右長輪不盡溪欲滿無底竇跳波翻潛魚震響落飛狖
清寒入山骨草木盡堅瘦空蒙煙靄閒頽洞金石奏彎彎飛橋出
湫湫半月殼玉淵神龍近雨雹亂晴晝垂瓶得清甘可嚙不可漱

高郵陳直躬處士畫鴈

蘇軾

野鴈見人時未起意先改君從何處看得此無人態無乃槁木形
人禽兩自在北風振枯葦微雪落瑾瑾慘澹雲水昏晶熒沙磔碎
弋人悵何慕一舉渺江海

次韻王觀正言喜雪

蘇軾

聖人與天通有詔寬獄市好語夜喧街溼雲朝覆砌紛然退朝後
色映宮槐媚欲誇翦刻工故上朱藍袂我方執筆待未敢書上瑞

君猶伏閣爭高論亦少慰霏霏止還作益益風與氣神龍久潛伏
一怒勢必倍行當見三白拜舞謹萬歲歸來飲君家酣詠追既醉

故李承之待制六丈挽詞

蘇軾

青青一寸松中有梁棟姿天驥墮地走萬里端可期世無阿房宮
可建五丈旗又無穆天子西征燕瑤池才大古難用老死亦其宜
丈夫恐不免豈患莫已知公如松與驥少小稱偉奇俯仰自廊廟
笑談無羌夷清朝竟不用白首仍憂時願斬橫行將請烹乾沒兒
言雖不見省坐折姦雄窺嗟我去公久江湖生白髭歸來耆舊盡
零落存者誰比公嵇中散龍性不可羈疑公李北海慷慨多雄詞
淒涼五君詠沉痛八哀詩邪正久乃明人今屬公思九原不可作
千古有餘悲

送范純粹守慶州

蘇軾

才大古難用論高常近迂君看趙魏老乃為滕大夫浮雲無根蒂
黃潦能須臾知經幾成敗得見真賢愚羽旄照城闕談笑安邊隅

當年老使君赤手降於菟諸郎更何事折箠鞭其雛吾知鄧平叔
不鬪月支胡

送千乘千能兩姪還鄉

蘇軾

治生不求富讀書不求官譬如飲不醉陶然有餘歡君看龐德公
白首終泥蟠豈無子孫念顧獨遺以安鹿門土冢回牀下拜龍鸞
躬耕竟不起耆舊節獨完念汝少多難冰雪落綺紈五子如一人
奉養真色難烹雞獨饋母自饗苜蓿盤口腹恐累人寧我食無肝
西來四千里敝袍不言寒秀眉似我兄亦復心閑寬忽然捨我去
歲晚留餘酸我豈軒冕人青雲意先闌汝歸蒔松菊環以青琅玕
檀陰三年成可以掛我冠清江入城郭小圃生微瀾相從結茅舍
曝背談金鑿

故周茂叔先生濂溪

蘇軾

世俗眩名實至人疑有無怒移水中蟹愛及屋上烏坐令此溪水
名與先生俱先生本全德廉退乃一隅因拋彭澤米偶似西山夫

遂卽世所知以爲溪之呼先生豈我輩造物乃其徒應同柳州柳
聊使愚溪愚

歐陽叔弼見訪道陶淵明事因語及元載之死歎其識有
淺深退作此詩

淵明求縣令本緣食不足束帶向督郵小屈未爲辱翻然賦歸去
豈不念窮獨重以五斗米折腰營口腹如何元相國萬鍾不滿欲
胡椒銖兩多何用八百斛以此殺其身何啻抵鵠玉往者不可悔
吾其返自燭

竹間亭小酌懷歐陽叔弼季弼呈趙景貺陳履常一首

蘇軾

歲莫自急景我閑方緩觴醉飲西湖晚步轉北渚長地坐略少長
意行無澗岡久知薺麥青稍喜榆柳黃盎盎春欲動漱漱夜未央
水天鷗鷺靜月霧松檜香撫景方婉婉懷人重淒涼豈無一老兵
坐念兩歐陽我意正麋鹿君才亦圭璋此會恐難久此歡不可忘

東府雨中別子由

蘇軾

庭下梧桐樹三年三見汝前年適汝陰見汝鳴秋雨去年秋雨時
我自廣陵歸今年中山去白首歸無期客去莫歎息主人亦是客
對牀定悠悠夜雨空蕭瑟起折梧桐枝贈汝千里行歸來知健否
莫忘此時情

過高郵寄孫君孚

蘇軾

過淮風氣清一洗塵埃容水木漸幽茂菰蒲雜游龍可憐夜合花
青枝散紅茸美人游不歸一笑當誰供故園在何處已偃手種松
我行忽失路歸夢山千重聞君有負郭二頃收橫從卷野畢秋穫
殷牀聞夜舂樂哉何所憂社酒粥面醲官游豈不好毋令到千鍾

蘇軾

閑居蓄百毒救此跛與盲依山作陶穴掩此暴骨橫區區效一漑
豈能濟含生力惡不已出時哉非汝爭

江月五首

蘇軾

嶺南氣候不常吾嘗云菊花開時乃重陽涼天佳月卽中秋不須以日月爲斷也今歲九月殘暑方退旣望之後月出愈遲然余嘗夜起登合江樓或與客遊豐湖入栖禪寺扣羅浮道院登逍遙堂逮曉乃歸杜子美云四更山吐月殘夜水明樓此殆古今絕唱也因其句作五首仍以殘夜水明樓爲韻

一更山吐月玉塔卧微瀾正似西湖上湧金門外看冰輪橫海闊香霧入樓寒停鞭且莫上照我一杯殘

二更山吐月幽人方獨夜可憐人與月夜夜江樓下風枝久未停露草不可藉歸來掩關卧唧唧蟲夜話

三更山吐月栖鳥亦驚起尋夢中游清絕正如此驅雲埽眾宿俯仰迷空水幸可飲我中不須違洗耳

四更山吐月皎皎爲誰明幽人赴我約坐待玉繩橫野橋多斷板山寺有微行今夕定何夕夢中游化城

五更山吐月窗迴室幽幽玉鈎還掛戶江練卻明樓星河澹欲曉

鼓角冷知秋不眠翻五詠清切變蠻謳

遷居之夕聞鄰舍兒誦書欣然而作

蘇軾

幽居亂蛙黽生理半人禽蹇然已可喜况聞弦誦音兒聲自圓美誰家兩青衿且欣習齊唻未敢笑越吟九齡起韶石姜子家日南吾道無南北安知不生今海闊尙掛斗天高欲橫參荆榛短牆缺燈火破屋深引書與相和置酒仍獨斟可以侑我醉琅然如玉琴

次韻子由所居

蘇軾

幽居有古意義井分西牆誰言三伏熱止須一杯涼先生坐忍渴羣鷄自披猖眾散徐酌飲逡巡味尤長

和陶淵明飲酒

蘇軾

道喪士失已出語輒不情江左風流人醉中亦求名淵明獨清真談笑得此生身如受風竹掩冉眾葉驚俯仰各有態得酒詩自成和陶淵明怨詩楚調示龐主簿及鄧治中

蘇軾

當歡有餘樂在戚亦頽然淵明得此理安處固有年嗟我與先生
所賦良奇偏人間少宜適惟有歸耘田我昔墮軒冕毫釐真市廛
歸來卧重茵憂愧自不眠如今破茅屋一夕或三遷風雨睡不知
黃葉滿枕前寧當出怨句慘慘如孤煙但恨不早悟猶推淵明賢

和陶淵明雜詩

蘇軾

眞人有妙觀俗子多妄量區區勸粒食此豈知子房我非徒跣相
終老懷未央免死縛淮陰狗功指平陽哀哉亦可羞世路皆羊腸

和陶淵明庚戌歲九月中於西田穫早稻

蘇軾

蓬頭二獠奴誰謂愿且端晨興洒掃罷飽食不自安願治此圃畦
少資主游觀晝功不自覺夜氣乃潛還早韭欲爭春晚菘先破寒
人間無正味美好出艱難早知農圃樂豈有非意干尙恨不持鋤
未免駢我顏此心苟未降何適不閒關休去復歇去食菜何所歎

和陶淵明始作鎮軍參軍經曲阿

蘇軾

虞人非其招欲往畏簡書穆生責醴酒先見我不如江左古弱國
強臣擅天衢淵明墮詩酒遂與功名疏我生值良時朱金義當紆
天命適如此幸收廢棄餘獨有愧此翁大名難久居不思犧牛龜
兼取熊掌魚北郊有大資南冠解囚拘眷言羅浮下白鶴返故廬

和陶淵明詠三良

蘇軾

此生太山重忽作鴻毛遺三子死一言所死良已微賢哉晏平仲
事君不以私我豈犬馬哉從君求蓋帷殺身固有道大節要不虧
君爲社稷死我則同其歸顧命有治亂臣子得從違魏顆眞孝愛
三良安足希仕宦豈不榮有時纏憂悲所以靖節翁服此黔婁衣

和陶淵明貧士

蘇軾

夷齊恥周粟高歌誦虞軒產祿彼何人能致綺與園古來避世士
死灰或餘煙末路益可羞朱墨手自研淵明初亦仕絃歌本誠言
不樂乃徑歸視世差獨賢

夏書

章望之

一日常百刻轉若車輪忙千日十萬刻百年能幾長達者齊古今
一生甚微茫夏日豈為永而足以較量人世不足惜行善乃自彰
無及閒暇時般樂為淫荒夷齊餓人者顏閔非公王其人品孰亞
周氏與虞唐亦用仁義積豈今身未亡富貴無可恃莫與公道強
夜思晝以力四序皆流光示君夏晝誦惕惕其自傷

宿簡寂觀

袁陟

名山崇祕祠終夜得清賞真氣溢空浮流泉隨砌響林巒片月散
殿閣高風行天際斗杓直庭中盤石橫即陸脩靜朝斗之石逸人今何之故
嶺不改秀白鶴唳松梢青燈覩巖竇恍追汗漫駕深悟逍遙言四
顧羣動寂冥心歸灝元

再遊雲居

登山有三路去冬自防潭自西莊而
上取姚田莊路惟麥莊一路未行

袁陟

風吹嶺頭樹似欲招行客緣雲過絕頂復見紫霄宅平觀三百里
下視八千尺隼擊九秋嚴鵬展萬里翻五老鎮相望西岫天與敵

可笑培塿羣亦自矜寸碧氛埃卷宇宙鴈鷺下川澤既諧惠智心
若蹈聖賢域危亭據中峯回抱竦天壁沈沈古帝坐左右列夔稷
舉頭河漢通直欲攀南極合奏天地籟兩耳清歷歷吁嗟萬類微
胡為競朝夕安知太清上我方適所適尚思西嚟路去冬躡雙履
高興挹洪崖大句鼓天力到今巖壑閒浩浩起金石安得少陵翁
物外講新格重來羈鞅在欲隱世累迫多謝受命松長存歲寒色

覆驗餘姚道中

王存

一夫死非命滌驗更兩吏一囚坐法誅三覆與眾棄去年交趾敗
殺戮無賤貴江淮屢歲膏積殍溝壑穢聖人於赤子愛重若彼至
謹小以遺大誰其原帝意

雜興三首

鮮于侁

幽居觀物變天道固虛盈炎取日方熾微陰一己生涼風動野草
桃李先飄零蝟蟾集高柳絡緯響空庭愁心獨耿耿宵夢竟難成
一氣斡元造為功未嘗煩羣生自委化天地亦何言鳧脰不可增

楮葉不可鑄欲益固爲損勞心非自然不見平陽侯醇酒聊終年
三王貴養老取重在乞言酒醴副佳肴黃髮斯皤然朝廷本忠厚
風俗亦變遷豈意漢道微侍中惟少年耆舊無備問李公所以難
新堂夜坐月色皎然由連理亭信步庭中徘徊久之因爲

五言一首

鮮于侁

秋風動微涼天雨新霽後閉齋獨隱几明月在高柳振衣步庭下
顥氣入襟袖天空雲漢明隱約辨列宿蒼蒼松檜上零露霏欲流
去脫葉滿閑園繁華迨衰朽清宵望蟾彩宜付一杯酒多病謝樽
罍城頭轉寒漏

海州觀放鵲搏兔不中而飛去

沈括

秋霜濯空林暮日在峯頂冥冥起長風稍稍絕遺影驍禽值猛搏
俯取不待頃豈非求者乖矯翻成遠騁未能謝榛莽那用遽悻悻
此心竟可憐得失未宜病

觀餘姚海氛

謝景初

海上風與雨未朕先氣升澤鹵雜山雲翁鬱相薰蒸交語面已障
安辨邱與陵衣濡帶革緩臭腥殊可憎自非昌其陽疾癘得以乘
君子卻陰邪何必醫師能

餘姚董役海隄有作

謝景初

五行交相陵海水不潤下處處壞堤防白浪大於馬顧予爲其長
恐懼敢暫捨董眾完築塞跋履率曠野使人安於生茲不羞民社
調和陰與陽自有任責者

法喜堂

謝景初

虛堂庇風雨結構不務壯外飾無髹髹置物況容長開篋藥劑靈
拈碁白黑抗階花澹亦天庭石碧交向出門鳥雀喧燕處物我喪
吳俗夸有素佛徒侈相尙獨能守質靜坐以矯流宕棲之果自喜
何須山海上

村居

文與可

日影滿松窗雲開雨初止晴林梨栗熟曉巷兒童喜牛羊深澗下

鳧鴈寒塘裏田父酒新成餅饕饋隣里

新晴山月

文與可

高松漏疏月落影如畫地徘徊愛其下夜久不能寐怯風池荷卷
病雨山果墜誰伴予苦吟滿林啼絡緯

屬疾梧軒

文與可

高梧覆新葉滿院發華滋白日一何永清陰閑自移暖蟲垂到地
晴鳥語多時病肘倚枯几泊然忘所思

宋文鑑卷第十八

宋文鑑卷第十九

五言古詩

買炭

蘇轍

早行

孔文仲

逍遙亭二首

潘興嗣

師道

潘興嗣

過百里大夫冢

黃庭堅

寄秉夷

黃庭堅

和子瞻粲字韻二首

黃庭堅

寄師載

黃庭堅

過家

黃庭堅

上冢

黃庭堅

題王黃州墨蹟後

黃庭堅

和張文潛贈晁無咎二首

黃庭堅

留王郎

和孔常父雪

次韻答邢惇夫

題竹石牧牛

贈秦少儀

謝公定和二范秋懷

宿舊彭澤懷陶令

題宛陵張待舉曲肱亭

和邢惇夫秋懷

次謝與迪所作竹

次韻楊明叔見餞十首

拜劉凝之畫像

跋子瞻和陶詩

次徐仲車因婁行父見寄之詩

黃庭堅

黃庭堅

黃庭堅

黃庭堅

黃庭堅

黃庭堅

黃庭堅

黃庭堅

黃庭堅

黃庭堅

黃庭堅

黃庭堅

黃庭堅

遊蔣彥回玉芝園

沐浴有感

就食

古興

濰陽

別三子

示三子

田家

送蘇公知杭州

送李奉議亳州判官

觀克文忠公家六一堂圖書

咸平讀書堂

次韻答晁無斁

買炭

黃庭堅

彭汝礪

楊蟠

沈遼

徐積

陳師道

陳師道

陳師道

陳師道

陳師道

陳師道

陳師道

蘇轍

苦寒搜病骨絲纒莫能禦
斫薪燎枯竹勃鬱煙充宇
西山古松樾林大招斤斧
根槎委溪谷龍伏熊虎踞
挑抉靡遺餘陶穴付一炬
積火變深鱗牙角猶忿怒
老翁睡破氈正晝出無履
百錢不滿籃一坐幸至暮
御爐歲增貢園直中常度
閭閻不敢售根節姑付汝
升平百年後地力已難富
知夸不知嗇俛首欲誰訴
百物今盡然豈惟一炭故
我老或不及預爲子孫懼

早行

孔文仲

客興謂已旦出視見落月瘦馬入荒陂
霜花重如雪海風吹萬里兩耳凍幾脫
歲晏已苦寒近北尤凜冽況當清曉行
遡此原野闊笠飛帶繞頸指強不得結
農家煙火微炙手粗可熱豈能迂我留
而就苟且活仰頭視四字夜氣亦漸豁
苦心待正晝白日想不缺

逍遙亭

潘興嗣

作亭名逍遙此理誠不虛寬於一天下
原憲惟桑樞況我卜清曠風雨庇有餘
方池容瀲灩小徑足縈迂花木頗窈窕
松筠亦扶疏鳴蛙送鼓吹好鳥來笙竽
可琴亦可詠可飲亦可娛盤雖無下筍
賓食亦有魚恢論或申旦隱几忘移晷
困來展足眠醉倒從人扶率爾但付暢
因煩而領無艱侯三萬軸方朔五車書
棄置復棄置任自相賢愚無妨吾逍遙
此樂誠何如

師道

黃庭堅

師道久不振小儒咸自私破崖求圭角
務出己新奇惻惻去聖遠六經秦火曠
不有傳授學涉獵安所爲漢儒守一經
學者如雲隨承習雖未盡模法有根基
薦紳立朝廷開口應萬機附對皆據經
金石確不移熟爛見本末較然非可欺
吾願下學官各立一經師務盡道德業
不取章句辭庶幾昔人風炳然復在茲

過百里大夫冢

黃庭堅

行客抱憂端况復思古人何年一邱土
不見石麒麟斷碑略可讀大夫身霸秦
虞公納垂棘將軍西問津安知五羊皮
自粥千金身末俗工媒孽浮言妬道真
幸逢孟軻賞不愧微子魂

寄秉夷

少時誦詩書貫穿數萬字爾來窺陳編記一忘三二光陰如可玩
老境翻手至良醫曾折足說病迺真意

黃庭堅

和子瞻粲字韻二首

黃庭堅

公材如洪河灌注天下半風日未嘗櫻晝夜聖所歎名世三十年
窮無歌舞玩入宮又見妬徒友飛鳥散一飽事難諧五車書作伴
風雨暗樓臺雞鳴自昏旦雖非錦繡贈欲報青玉按文似離騷經
詩窺關雎亂賤生恨晚學曾未奉巾盥昨蒙雙鯉魚遠託鄭人緩
風義薄秋天神明還舊貫更磨薦禰墨推挽起疲軟忽忽未嗣音
微陽歸候炭仁風從東來拭目望齋館鳥聲日日春柳色弄晴暖
漫有酒盈樽何因見此粲

元龍湖海士毀譽各相半下牀卧許君上牀自永歎丈夫屬有念
人物非所玩坐令結歡客化為煙霧散武功有大略亦復寡朋伴
詠歌思見之長夜鳴鶡旦東南望彭門官道平如按簡書束縛人

一水不能亂斯文媿柜鬯可用圭瓚盟誠求活國醫何忍棄和緩
開疆日百里都內錢朽貫銘功甚俊偉迺見儒生懦且當置是事
勿求冰作炭上帝羣玉府道家蓬萊館曲肱夏簟寒炙背冬屋暖
只令文字垂萬世星斗粲

寄師載

黃庭堅

齊地穀翔貴排門無囊饋二仲有甘旨奉親亦良勤原田水洗洗
何時稼如雲無民願豐歲政自不忘君

過家

黃庭堅

絡緯聲轉急田車寒不運兒時手種柳上與雲雨近舍傍舊傭保
少換老欲盡宰木鬱蒼蒼田園變畦畛昭延屈父黨勞問走婚親
歸來翻作客顧影良自哂一生萍託水萬事雪侵鬢夜闌風隕霜
乾葉落成陣燈花何故喜大是報書信親年當喜懼兒齒欲毀齧
繫船三百里去夢無一寸

上冢

黃庭堅

自公返蓬華稅駕上邱隴霜露此日悲松楸十年拱養難數羽毛
初不及承奉康州斷腸猿風枝割永痛少年不如人登仕無前勇
髮疏牙齒搖鯨波怒號洵願為保家子敢議世輕重稱觴太夫人
魚菜贍庖供

題王黃州墨蹟後

黃庭堅

掘地與斷木智不如機春聖人懷餘巧故為萬物宗世有斲泥手
或不待郢工往時王黃州謀國極匪躬朝聞不及夕百壬避其鋒
九鼎安盤石一身轉孤蓬浮雲當日月白髮照秋空諸君發蒙耳
汲直與臣同

和張文潛贈晁無咎二首

黃庭堅

龜以靈故焦難以文故翳本心如日月利欲食之既後生玩華藻
照影終沒世安得八紘宜以道獵眾智
談經用燕說東棄諸儒傳濫觴雖有罪末派瀾九縣張侯直理窟
堅壁勿與戰難以口舌爭水清石自見

留王郎

黃庭堅

河外吹沙塵江南水無津骨肉常萬里寄聲何由頻我隨簡書來
顧影將一身留我左右手奉承白頭親小邦王事略蟲鳥聲無人
王生解鞍馬夜語雞喚晨母慈家人肥女慧男垂紳有田為酒事
豚韭及秋春生涯得如此舊學更光新索去何草草少留慰藉勤
百年才一炊六籍經幾秦要知胷中有不與跡同陳郢人懷妙質
聊欲運吾斤

和孔常父雪

黃庭堅

春皇賦上瑞來窻黃屋憂下令走百神大雲庇九邱風聲將仁氣
艷艷生瓦溝寒花舞零亂表裏照皇州千門委圭璧曉日不肯收
元年冬無澤穴處長螟蝨兩宮初盱食補袞獻食籌有道四夷守
無征萬邦休耆年秉國論涇渭極分流輟未入班品逸民盡歸周
股肱其一體閒不容戈矛人材如金玉同美異剛柔政須眾賢和
乃可疏共啜改弦張弊法病十九已瘳玉指要不匿蝕非日月羞

桑林請六事河水問九疇天意果然得立功與吾謀此物有嘉德
占年在麥秋近臣知天喜玉色動冕旒儒館無它事作詩配崇邱

次韻答邢惇夫

黃庭堅

爲山不能山過在一簣止渥洼騏驎兒墮地志千里岷山初濫觴
入楚乃無底將昇聖人堂道固有廉陛邢子好少年如世有源水
方求無津涯不作蛙井喜兒中兀老蒼趣造甚奇異過閱王公門
袖中有漫刺別來阻河山望遠每障袂斯文向千載有志常寡遂
後生文楚楚照影若孔翠不應太玄草晞價咸陽市西作枕簟秋
官閑省中睡夢不到漢東茗椀乃爲崇聞君肺渴減頗復佳食寐
讀書得新功來鴈寄一字

題竹石牧牛

黃庭堅

野次小崢嶸幽篁相依綠阿童三尺箠御此老叢棘石吾甚愛之
勿遣牛礪角牛礪角尙可牛鬪殘我竹

贈秦少儀

黃庭堅

汝南許文休馬磨自衣食但聞郡功曹滿世名藉藉渠命有顯晦
非人作通塞秦氏多英俊少游眉最白頗聞鴻鴈行筆皆萬人敵
吾蚤知有覲而不知有覲少儀袖詩來剖蚌珠的歷乃能持一鏃
與我箭鋒直自吾得此詩三日卧向壁挽士不能寸推去輒數尺
才難不其然有亦未易識

謝公定和二范秋懷

黃庭堅

西風一葉脫迹已不可掃巷有白馬生朝回焚諫草誰云事君難
是亦父子閒所要功補袞不言能犯顏

宿舊彭澤懷陶令

黃庭堅

潛魚願深渺淵明無由逃彭澤當此時沈冥一世豪司馬寒如灰
禮樂卯金刀歲晚以字行更始號元亮淒其望諸葛骯髒猶漢相
時無益州牧指爲用諸將平生本朝心歲月閱江浪空餘詩語工
落筆九天上向來非無人此友獨可尙屬余剛制酒無用酌杯盞
欲招千載魂斯文或宜當

題宛陵張待舉曲肱亭

黃庭堅

仲蔚蓬蒿宅宣城詩句中人賢忘巷陋境勝失途窮寒菹書萬卷
零亂剛直曾偃蹇勳業外嘯歌山水重晨雞催不起擁被聽松風

和邢惇夫秋懷二首

黃庭堅

王度無畦畛包荒用蕙河秦收鄭渠成晉得楚材多人當其物
不但軸與蕝六通而四闢玉燭四時和

相如用全趙留侯開有漢名登泰山重功略天下半讓頗封韓彭
事成羣疑泮天道常曲全小智驚後患

次謝與迪所作竹

黃庭堅

吾宗墨脩竹心手不自知天公造化鑪攬取如拾遺風雪煙霧雨
榮悴各一時此時抱明節君又潤色之抽萌或發石懸筆有帖危
林梢一片雨造次以筆追猛吹萬籟作微涼大音稀霜兔束豪健
松煙泛硯肥盤桓未落筆落筆必中宜今代捧心學取笑如東施
或可遺巾幘選悞如辛毗生枝不應節亂葉無所歸非君一起子

衰疾豈能詩憶君初解鞍新月掛彎眉夜月上金鏡坐歎光景馳
我有好東絹晴明要會期漪漪淇園姿此君有威儀願作數百竿
水石相因依宅年風動塵洗我別後思開圖慰滿眼何時遂臻茲

次韻楊明叔見饒十首

黃庭堅

平津喜牧豕飲飛能斬蛟終藉一汲黯淮南解兵交楊子有直氣
未忍死草茅引之入漢朝誰為續絃膠
楊君清渭水自流濁涇中今年貧到骨豪氣似元龍男兒生世間
筆端吐長虹何事與秋螢爭光蒲葦叢
事隨世滔滔心欲自得得楊君為已學度越流輩百坐捫故衣蝨
垢襪春汗黑睥睨紈袴兒可飲三斗墨
清淨草玄學西京有子雲太尉死宗社大鳥泣其墳寂寥向千載
風流被仍昆富貴何足道聖處要策勳
桑輿金石交既別十日雨子輿裹飯來一笑相告語楊君困筆瓢
諸公不能舉儻可從我歸沙頭駐鳴鶻

山圍少天日孤鬼能作妖
睽閃載一車獵人用鳴梟
小智窘流俗蹇淺不能超
安得萬里沙霜晴看射鵬

元之如砥柱大年若霜鷲
王揚立本朝舉世作郭郭
觀公有膽氣似可繼前作
丈夫存遠大曾次要落落

虛心觀萬物險易極變態
皮毛剝落盡唯有真實在
侍中乃珥貂御史卽冠豸
願影或可羞短蓑釣寒瀨

松柏生澗壑坐閱草木秋
金石在波中仰看萬物流
骯髒自骯髒伊優自伊優
但觀百世後傳者非公侯

老作同安守蹇足信所便
胷中無水鏡敢當吏部銓
恨此虛名在未脫世糾纏
念作白鷗去江南水如天

拜劉凝之畫像

黃庭堅

弃官清潁尾買田落星灣
身在菰蒲中名滿天地間
誰能四十年保此清淨退
往來澗谷中神光射牛背

跋子瞻和陶詩

黃庭堅

子瞻謫嶺南時宰欲殺之
飽喫惠州飯細和淵明詩
彭澤千載人東坡百世士
出處雖不同風味乃相似

次徐仲車因婁行父見寄之詩

黃庭堅

前朝老諸生太半正邱首
投荒萬里歸煩公問健否
往時望江宰今爲夏津吏
宅日可教之玉音尙無棄

遊蔣彥回玉芝園

黃庭堅

春生瀟湘水風鳴澗谷泉
過雨花漠漠弄晴絮翩翩
名園上朱閣觀後復觀前
借問昔居人岑絕無炊煙
人生須富貴河水清且漣
百年共如此安用涕潺湲
蔣侯真好事杖屨喜接連
車載溪中骨堆排若差肩
厭看孔壬面醜石反成妍
感君勸我醉吾亦無閒然
亂我朱碧眼空花墜便翮
行動須人扶那能金石堅
愛君雷式琴湯湯發朱絃
但恨賞音人大半隨逝川
平生有詩病如痼不可痊
今當痛自改三釁復三瀦

沐浴有感

彭汝礪

去垢如去邪不欲留毫分髮不止一沐身不止三熏如何迷本原
浴德不自勤區區養槭棘俯仰愧前聞

就食

楊蟠

未知田上勞徒厭鼎中味及與農事接方驚食者貴余生寡營求
念此豈易致況敢懷寸祿平居但羞愧

古興

沈遼

我不歎白髮安得新少年往者不失執後來豈能賢世間亦多士
倚伏良有緣寄語夸奪子古人已皆然

濉陽

徐積

嘗聞唐李氏世號為賢妻以力營七喪或謂難庶幾孰知蔡家婦
其事乃同之豈特在中饋無往而無儀孝於其所尊慈於其所卑
既知義所在能終義所為我生至此極我嫁逢百罹其屬死略盡
其骨俱無歸身為未亡人心乃真男兒以己任其責無忘須臾時
但恐事不濟安知恤寒飢乃損奉生具而為送亡資面不御膏沐

首不加冠笄金珠鬻於市文繡容何施更無囊中裝唯有身上衣
殆將截其髮幸苟完其肌所得蓋良苦所積從細微如此十年久
猶以為支離日時卜諸良宅兆相厥宜一舉十八喪一旦得所依
手自植松楸身亦沾塗泥何暇裹雨足但知勤四肢居者嘆於室
行者泣於歧鳥亦助叫號人思操藥裡冥冥長夜魂所獲喜可知
鬱鬱佳城中不為中道口卒辦其家事少慰而心悲義深海可涸
行堅山可摧孤誠貫白日幽光凌虹霓吾聞古烈女犖犖非無奇
一死盡易處一節亦易持至如張氏者使人尤歔歛誰為孝婦傳
誰為黃絹碑亦有淮上翁為述濉陽詩移書太史氏無令茲逸遺

別三子

陳師道

夫婦死同穴父子貧賤離天下寧有此昔聞今見之母前三子後
熟視不得追嗟乎胡不仁使我至於斯有女初束髮已知生離悲
枕我不肯起畏我從此辭大兒學誰言拜揖未勝衣喚翁我欲去
此語那可思小兒襁褓間抱負有母慈汝哭猶在耳我懷人得知

示三子

陳師道

去遠卽相忘歸近不可忍兒女已在眼眉目略不省喜極不得語
淚盡方一晒了知不是夢忽忽心未穩

田家

陳師道

雞鳴人當行犬鳴人當歸秋來公事急出處不待時昨夜三尺雨
寵下已生泥人言田家樂爾苦人得知

送蘇公知杭州

陳師道

平生羊荊州追送不作遠豈不畏簡書放麈誠不忍一代不數人
百年能幾見昔如馬口銜今爲禁門鉉一雨五月涼中宵大江滿
風帆目力短江空歲年晚

送李奉議亳州判官

陳師道

祁氏號外府藏室多異書自公有餘力一覽意何如爲學雖日益
受益不受誣正須高着眼濠梁有游魚

觀克文忠公家六一堂圖書

陳師道

生世何用早我已後此翁頗識門下士略已聞其風中年見二子
已復歲一終呼我過其廬所得非所蒙 先朝羣玉殿冠佩環羣
公 神文煥王度喜色見 天容御榻誰復登 帝書元自工黃
絹兩大字一覽涕無從似欲託其子天意人與同歷數況有歸敢
有貪天功集古一千卷明明並羣雄誰爲第一手未有百世公廟
器刻科斗寶樽播華蟲緬懷弁服士酬獻鳴琤瑤插架一萬軸遺
子以固窮素琴久絕絃棊酒頗闕供向來一瓣香敬爲曾南豐世
雖嫡孫行名在惡子中斯人其已遠千歲幸一逢吾老不可待草
露溼寒蛩

咸平讀書堂

陳師道

昔人三百篇善世已有餘後生守章句不足供囁嚅一登吏部選
筆硯隨埽除閉閣書眉嫵隔屋聞歌呼奉公用漢律寧復要詩書
俛首出跨下枉此七尺軀今代陶朱公不作大梁屠計然特未用
意得輕全吳爲邦得畿縣政密自計疏寧書下下考不奉急急符

用意簿領外築室課典謨平生五千卷還舍不問途舊事更漢唐
稍以詩自娛復作無事飲醉卧擁青奴桃李春事繁軒窗晝景舒
鳴屋鳩喚雨窺簷燕哺雛休吏散篇秩脩篁獻笙竽听然一啟齒
斯民免爲魚

次韻答晁無斁

陳師道

女生願有家名妾以不聘田里亦慕君又惡不由正欲行不問塗
已破窰顧甑耕蠶無一塵庖井要三徑還家憂患餘挽須兒女競
十年寧有此一寒可無命平生晁夫子得士公室慶稍無車馬音
復作賓客請論文到韓李念舊說蘇鄭長年斷消息獨語誰和應
此生恩未報他日目不瞑歸卧無好懷扣門有佳聽誰來雪霜後
更覺天宇淨少好老未工持刃授子柄

宋文鑑卷第十九

宋文鑑卷第二

五言古詩

寄楊道孚

張耒

旦起

張耒

夏日雜感

張耒

春日雜書

張耒

感遇

張耒

昭陵六馬

張耒

斑竹

張耒

寓陳詩

張耒

羅官粟有感

張耒

賀雨拜表

張耒

田居

秦觀

海康書事五首

秦觀

孤憤吟二首

張商英

接花

陳瓘

文選樓

李廌

寄陳履常

邢居實

雨後出城馬上作

邢居實

述懷

任伯雨

春風

洪朋

初行山

晁詠之

王立之大裘軒

謝逸

閨恨

謝逸

醪醑依柏引蔓上冒其顛

崔鷗

江月圖

崔鷗

雨餘

鮑欽止

寄友人

張繹

秋日書懷

毛滂

次韻毛達可給事秋懷念歸

倪濤

贈趙正之

林敏功

送趙叔問奉議歸南都

方元修

張牧之竹溪

林敏修

山行

曹緯

燭蛾

賀鑄

寄楊道孚

張耒

士師我自出爽邁凌清秋年少不飲酒昏燈夜問囚君家外大父
聽獄代其憂備飢朝煮飯驅蚊夜張幃獄成上府時稽顙呼張侯
怒心臨縲繼相盜以戈矛無令市死厲請帝號重幽

旦起

張耒

漫漫東牖白開帷納晨光欠伸推夜枕扣齒被朝裳瓦盎汲石泉
漱甘齒頰涼維茲孟夏初宿雨清高堂棲鳥起且啁露鷺鳴更藏

悠悠晚花殷落落古柳蒼西舍初鳴春東鄰出求糧客馬已別櫪
商車欲踰岡義和一揚輝羣動皆擾攘有生無不求誰得偃于牀
人生但如此勤苦亦可傷况我病倦翻飄飄信風翔永懷中林士
棲志煙霞鄉願言寄旅跡棲託以徜徉

夏日雜感

張耒

士而懷其居孔子亦云非賢臣事晉侯夜載使逃齊酖毒比燕居
君子不可懷樂小必害大安近遠之迷野芻養騏驥當念和鑾馳
一飽願即止幾何非犬雞高賢意有在汲汲不敢違安能守槽櫪
長伴兒曹嬉

春日雜書

張耒

昨日爲雨備今晨天乃風障風謹自保通夕雪迷空備一常失計
盡備力不供因之置不爲拱手受禍凶當爲不可懷任彼萬變攻
築室如金石何勞計春冬此道簡且安古來家國同

感遇

張耒

穰侯擅關中頗畏諸侯客搜車計已遲終困范公策庸夫吝富貴
百計私自惜勢移禍敗至智巧竟何益至公覽英俊直補乃無隙
請看桑林餓亦脫趙子厄

昭陵六馬

張耒

天將剗隋亂帝遣六龍來森然風雲姿颯爽毛骨開颺馳不及視
山立儼莫回長鳴視八表擾擾萬駑駘秦王龍鳳姿魚鳥不足摧
腰間大白羽中物如風雷區區數豎子縛取如提孩手持埽天帚
六合無塵埃艱難濟大業一一非常才惟時六驥足績與英衛陪
功成鏘八鸞玉輅行天街荒涼昭陵闕古石埋蒼苔

斑竹

張耒

重瞳陟方時二妃蓋老人安肯泣路傍洒淚留叢筠頗疑葛陂化
點點留斑鱗慎勿脫水去人世多埃塵

寓陳詩

張耒

我不知暑退但覺衣汗乾頗怪庭中天湛然清以寬有物叫草根

啾啾自相喧問知已新秋大火流金丸天工變寒暑正爾事亦繁
靜觀付一笑吾事寧相關但知筋力健悠然佳意還喧喧憎鄰里
砧杵亂人眠

羅官粟有感

張耒

持錢羅官粟日夕擁公門官價雖不高官倉常苦貧兼并閉困廩
一粒不肯分伺待官粟空騰價邀吾民坐視既不可禁之亦紛紜
擾擾田畝中果腹才幾人我欲究其原宏闊未易陳哀哉天地間
生民常苦辛

賀雨拜表

張耒

羣雲雨事畢振旅不復陣埽天無一塵千里還綠澗晨朝大明賀
沙路萬蹄印朝光泛翠瓦佳氣去人近頗聞避斧辰侑膳徹龍筭
願君愛物心從此至堯舜

田居

秦觀

雞號四鄰起結束赴中原戒婦預爲黍呼兒隨掩門犁鋤帶晨景

道路更笑喧宿潦濯芒屨野芳鬢鬢根霽色披宿露春空正鮮繁
辛夷茂橫阜錦雉嬌空園少壯已雲趨伶俜尚鴟蹲蟹黃經雨潤
野馬從風奔村落次第集隔塍致寒溫眷言月占好努力競晨昏

海康書事五首

秦觀

白髮坐鉤黨南遷海瀕州灌園以糊口身自離蒼頭籬落秋暑中
碧花蔓牽牛誰知把鋤人舊日東陵侯

荔子無幾何黃柑遽如許遷臣不惜日恣意移寒暑層巢俯雲木
信美非吾土草芳自有時鴨鳩何關汝

卜居近流水小巢依嶽岑終日數椽閒但聞鳥遺音鑪香入幽夢
海月明孤樹鷓鴣一枝足所恨非故林

培塿無松柏駕言出焉遊讀書與意會卻埽可忘憂尺蠖以時詘
其信亦非求得歸良不惡未歸且淹留

海康臘已酉不論冬孟仲殺牛搗祭鼓城郭爲沸動雖非堯歷頒
自我先人用大笑荆楚人嘉平獵雲夢

孤憤吟二首

張商英

平津諛武帝堯舜未為聰歸來東閣士稱頌比周公勢利變人心
上下交相蒙低顏望眉睫一喜生春風優游卒茲歲安知朝野空
青青一本桑下可百夫息泠泠一井泉上有千人汲千里以為郡
百里以為邑生齒豈不繁教化繁爾力何事北窗人歎此徒勞職

接花

陳瓘

色紅可使紫葉單可使千花小可使大子少可使繁天賦有定質
我力能使遷自矜接花手可奪造化權眾聞悉驚詫遣我屢歎吁
用智固巧矣天時可易歟我欲春採菊我欲冬賞桃汝不能栽接
汝巧亦徒勞雨露草必生雪霜松不死不死有本性必生亦時爾
汝之所變易是亦時所為時乎不可違何物不隨時

文選樓

李廌

申轅應楚聘鄒枚適梁苑藩侯喜賓客賢賢易鷹犬黃綺游漢庭
羽翼繒繳遠秦府十八公攀附名益顯昭明眾才子文囿俾蒐選

高齋切浮雲雉堞俯晴巘向應媿河閒筆削非大典

寄陳履常

邢居實

十年客京洛衣袂多黃塵所交盡才彥惟子情相親會合能幾日
歡樂何遽央春風東北來飄我西南翔驪駒已在門白日行且晚
停觴不能飲將去更復返把腕捋髭鬚悲啼類兒女人生非鹿豕
安得常羣聚朝別河上梁莫涉關山道匹馬逐飛蓬離恨如春草
去去日已遠行行淚橫臆昨日同袍友今朝異鄉客來時城南陌
始見梅花白回首漢江頭黃梅已堪摘杖策登高城極目迴千里
落日下青山但見白雲起遠望豈當歸長歌涕如雨歸心如明月
幽夢過潁汝抱膝長相思故人安可見忽枉數行書彷彿如對面
紛紜輦轂下冠蓋爭馳逐吹噓多賢豪肯復念幽獨空齋聽夜雨
深竹聞子規此情不可道此心君詎知

雨後出城馬上作

邢居實

既雨天氣佳微雲淡如掃欲尋煙際鐘騎馬河邊草紫椹飽黃鸝

人家夏蠶老田婦踏縑車隔籬語音好嗟我一何愚讀書浪枯槁
不及此中人終年客長道

述懷

任伯雨

元符庚辰歲孟冬十二日任子丞大宗碌碌奉朝籍聖主訪落初
聽言勞日昃諫路員有闕求人恐不及誰謂方遴選邂逅首疎逃
詔旨忽中授聞命但夕惕不是憂不合愛君憂失職既憂亦復喜
不是貪祿秩平生慕古人素願或可畢精神倍疏瀹激昂登文石
青雲開九天清光親咫尺每見情益交肝膽盡剖析敬承丁寧訓
重許以忠直自喜千載遇奮身遑他恤志欲收主威力先排巨室
切齒憤欽永刻意望夔稷不數千羊皮豈讓一狐腋勤勤履霜戒
不復慮不密問夜欲自勞百疏意何益哀哉愛君心不能當眾嫉
投湘爲獨醒得罪因懷璧尙賴天德廣閱歲已再謫仇人意未厭
窮荒必投斥轉海僅萬里艱危備經歷有時遭颶風天地如抹漆
雪浪山崩頽轟虓飛霹靂扁舟甚桔槔俯仰顛倒立雙檣捲欲折

繩斷水蘼蘼鯨鯢口垂涎噴咤煙雨集萬怪競周章腥臊助噓吸
生平仗忠信安敢保瞬息寅緣脫魚腹島嶼稍登陟天氣鬱欲流
土色焦成赤草木蒸氛霧亭午日未出荒徑少人行悉率走虺蜴
居民傍溪澗橫斜戶百十矮屋盡棚欄臭穢如圈櫪家啖菜粥
雜米無十一小魚與細鰕相尙珍鼎食烏言紛嘲哂卉服空蒙羃
顏色盡黃腫大半抱瘴疾其風貪以淫其俗拙以僻殆非人間世
宜爾太荒閭我生本匹夫賦性自真率雅有江海志仕宦特牽迫
一日偶遭際用捨何敢必但思忠邪分於國繫休戚周旋不恤緯
我意何窮極漆女倚門嘯我情第堙鬱嗚呼謀身者所宜念陰隲

春風

洪朋

春風吹桃李歛然滿中園羣動不遑息胡蝶紛飛翻我亦感茲時
步履遶林閒顏色豈不好持久良獨難置酒休其下聊復罄余歡
君看桃與李成蹊亦無言

初行山

晁詠之

霽靄初蒸雲落落欲墮石山深多晚花照水自紅碧漁艇入煙小
松竹凌煙直西風漾碧波扁舟恣崎側客從北方來苦遭世俗迫
登臨雖夙願山川多未識浩蕩涉寒流躋攀並蒼壁捫蘿窺鳥道
踏逕窮人迹清泉洗塵心山鳥慣幽客逸興良未已日下千崖赤
十載孫承公好具登山屐

王立之大裘軒

謝逸

小人拙生事三冬臥無帳忍寒東窗底坐待朝曦上徐徐晨光熙
稍稍氣血暢薰然四體和恍若醉春釀此法祕勿傳不易車百兩
君胡得此法開軒亦東向蘇公名大裘意豈在萬丈但觀名軒心
人人如挾纊

閨恨

謝逸

汲井澣我衣伐石固我墉塵埃不被體寂無人迹通洋洋西江水
我車不敢渡夙駕豈不早早行畏多露行止既有義離合亦有時
眾人豈無心不如我所之

醉醺依柏引蔓上冒其顛

崔鷗

春風亦已老自厭丹采媚獨留白雪花酒此千尺翠嗟峨珠籠冠
縹緲冒佛髻幽香勿襲人恐爲真色累但願保明姿終日奉清對
要之萬物夥汗潔自有類

江月圖

崔鷗

冥冥一葉輕不知水與天獨於灝氣中仰見素璧圓超然狂道士
起視清夜闌自拈白玉笛吹此江月寒想當萬籟息逸響流空煙
我從江海來形留意先還何當買魚篷追此水墨仙

雨餘

鮑欽止

礎潤雨欲作好風每相先蕭蕭清入簾令我心洒然閉門倦永夏
枕書日昏眠快此風雨餘端如濯飛泉空山有佳趨草木更幽妍
并華養文石香篆橫雲煙俯仰方丈閒勝事亦可憐永懷觸熱子
我勞良獨賢

寄友人

張繹

有客厭事事潔身山之幽寒暑不相貸乃有卒歲憂有生此有事
簡之成贅疣澄江本無浪不如信虛舟六經力道要無以利心求
一朝與理會萬境真天遊伊水正清冷子行無滯留西風昨夜至
送子馳中流落月洒殘夢已着古崖頭我病強送君是行良難儔
異時青門下誰識東陵侯

秋日書懷

毛滂

秋日吐微明寒葉墮半碧娟娟竹弄影冉冉香引脈窗明葉几淨
水石涵虛白茶開睡足眼苔上嬾行屐屋寒無燕雀豈獨少賓客
顧我警露友佇此遼天翻相對雖不言孤高比三益邇來世外心
漸覺眼界窄兒時喜功名今念真戲劇平生翻羹手欲爛誰能炙
豈待二頃田初無一廛宅第當營糟邱努力期百尺頽然寄疎慵
坐看駒過隙韓郎食不足苦心定誰惜那知落英繁吾食豈無夕
舉手謝飛鳶一鼠何勞嚇

次韻毛達可給事秋懷念歸

倪濤

結茅遠人村破屋水半扉涼葉墮清響空山轉斜暉微官臥江漢
素心久依依十年天涯秋搖落幾芳菲馬蹄歲月去蝶夢東南飛
平生邱壑志有言輒乖違不如孤征鴻春風自知歸

贈趙正之

林敏功

君爲稻田官君非力田科我今耕田夫爲君奏田歌南畝茨梁稼
東郊煙雨蓂田家不作苦柰此歲暮何憫憫望有年一失成蹉跎
立苗非不疎稊稗常苦多小人剝良善蓬蒿賤嘉禾去惡藉老農
芟夷戒駢羅夫君邦之彥妙年加切磋治國與治身此道終靡他
人心不相遠如以斧伐柯願君日顯榮吾言期不磨

奉同程致道著作次鮑溶冬成答客韻送趙叔問奉議歸

趙叔問奉議歸

南都

方元修

清秋不相借白髮日更多塵埃困煩促原野懷經過聊當倚滂潤
資以生吾禾豈不念離羣驚鵲窠王孫別都去澹若依松蘿
暫別亦復難賡詩飲無何我行那爾渺邈踰江河賸須作佳句

相我滄浪歌

張牧之竹溪

林敏修

張牧之隱於竹溪不喜與世接客來蔽竹窺之或韻人佳士則呼
船載之或自刺舟與語俗子十反不一見怒罵相踵弗顧也人或
以少漫郎余獨喜與古人意合乃作竹溪詩
幽閒古城陰結屋清溪曲溪流湛回映上有青青竹漫郎欣得之
綠髮詠空谷高風及前修勝趣隨遠矚惡客徒擾人立談非我欲
麾去寧汝嗔真意聊自足或言不當爾往往相謗譁答云豈吾私
恐作林泉辱源流別涇渭臭味同草木肯當百事勝容此一物俗
獨餘嵇阮輩蕩槩戒臣僕濁醪澆古胸日沒還秉燭僕忝瓜葛後
意氣頗相屬平生幾兩屐共老三徑菊行年事無定此計諾已宿
徑須買牛衣兒亦荷書簏從子竹閒遊溪魚剝寒玉

山行

曹緯

日出過山頭日入宿山下我行山亦行隱隱似奔馬朝昏山送迎

山意自傾寫借問征途閒誰如此山者

燭蛾

賀鑄


飛蛾來翩翩慕此堂上燭附炎竟何功自取焚如酷感彼萬動微
保生在無欲不見青林蟬飲風聊自足

宋文鑑卷第二十

Blank manuscript area with vertical lines for writing.

宋文鑑卷第二十

九



4